

四庫全書

集部

欽定四庫全書

集部

運覽漫稿卷一

詳校官編修臣 翟槐

中書_臣 劉源溥覆勘

總校官庶吉士臣 何思鈞

校對官中書臣 李 荃

謄錄舉人臣 孫 炯

欽定四庫全書

集部六

運覽漫稿

別集類五明

提要

臣等謹案運覽漫稿七卷明李昌祺撰昌祺名禎以字行廬陵人永樂甲申進士選庶吉

士授禮部郎中

按明初六科皆有庶吉士不止翰林有之故得以直授郎

中歷官廣西河南左布政使事迹具明史本

傳是編皆古近體詩並詩餘乃天順三年吉

安教授鄭綱所編史稱昌祺預修永樂大典
凡僻書疑事人多就質其詩清新華瞻音節
自然陳循序稱其本之以理充之以氣故雅
淡清麗宏偉新奇無不該備不必遠較於古
就今而論千百之中不過數輩曹安謫言長
語極推其題文丞相研一首朱彝尊靜志居
詩話亦謂李禎詩務謝朝華力啟夕秀取材
結體頗與段柯古相似蓋由其一變綺靡纖

巧之習而以流逸出之故別饒鮮潤迥異庸
蕪鄭瑗井觀瑣言乃曰李布政昌祺人多稱
其剛毅不撓嘗觀其運甍詩稿浮艷太逞不
類莊人雅士所為所謂根也慾焉得剛云云
是梅花一賦足累宋璟之生平矣執文章正
宗一編以進退古今之作者不亦隘乎惟其
中騶虞歌汴城閱武諸篇或稍傷俚俗然論
一篇之詩當字銖句兩而求之論一家之詩

則當統觀其全局不以一二章定工拙也乾隆四十三年六月恭校上

總纂官臣紀昀臣陸錫熊臣孫士毅

總校官臣陸費墀

欽定四庫全書

運覽漫稿卷一

明 李昌祺 撰

五言古體

擬影贈形

太極生萬彙
繫人最為靈
云胡浪自苦
馳騫跡靡寧
化機有恒運
疾急弗暫停
適見方紅顏
髣髴忽已星
人身非金石
終當歸沉冥
不如學神仙
服食煉爾形
君我兩

無壞永共天地齡願君取吾語日進參與苓

形答影

有形斯有影物理固其常我行爾必偕我息爾乃藏豈
但相依附實此同存亡學仙非無術却老亦有方古稱
彭聃輩其壽邈難量於今竟安在孰是長生鄉多君為
余勸茲道終杳茫參苓且當止莫若啣杯觴

神釋

人生斯世間於物亦豈殊二儀妙參贊政由我中居與

子雖三名其實本一軀出處既弗異如何乖所趨老氏
貴不死長生出貪愚神仙果何物天地尚或渝飲酒固
所好悲愁賴其驅從古戒沈湎先王有遺書學仙非吾
事痛飲豈我圖但當委大運俟命寧憂虞既來諒必去
此理端不誣逍遙以乘化荷鍾徒區區

甲戌九日陪瀧岡先生暨諸友登高旌陽宮分
韻得影字

蛩鳴霜清候葉飛秋盡景萸菊方交秀琴冊亦暫屏
後

巡出片泮次第陟松嶺涉隘齒或亂升曠序還整登降
屢斷續賡酬互馳騁檉林逋陰森蘚逕極修永席地藉
山雲臨流漱石井欲投岩棲人拂衣世外境寄情園兼
綺洗心箕與潁縫掖既身被逸致只神領偶此諧一醉
已見夕月影

淵明酌酒圖

耕耨有餘暇蔭此榆柳陰燕坐對佳菊解襟獨長吟老
農得美酒負榼遠見尋呼兒滌塵爵相與聊共斟終觴

兀然醉富貴非所欽吾生詎能幾為樂當自今

洞章一首送彭道士

赤明肇無始玉京輦神霄真人過死路五老御靈颺玄
梵超溟滓豁落開幽寥中有浩劫尊絳節諸天朝丹光
耀明景春華凌翠條欲結無窮遊飛神躡璇杓稽首拜
太上高舉同逍遙

題松菊堂卷

久矣厭流俗稍與世背馳癖性愛松菊並植當軒墀幽

金文已乃人二言
卷一
居無他玩雅好良在茲清風忽然至天籟鳴參差涼露
曉厭浥衆葢含華滋顧渠歲寒物自與靜者宜不形丁
生夢聊詠陶翁詩養拙茅簷下過此非所期

松石間意軒

夙有山水癖已忘天路遊屏跡衡門下愛此松石幽青
松蔭我屋白石臨溪流逍遙曳藜杖撫玩舒煩憂老農
解吾意負榼遠見投忻然笑相命且共飲數甌倦即憩
石坐時還撫松謳盡此一日樂明日非吾謀醉眠松下

石孰謂此生浮

送友人故鄉訪族

秋雨浹旬月積潦連平津慨然理舟楫訪我族中人相
去實緬邈悠悠隔冬春同源既分流萬世本一身駕言
遠相唁詎敢辭艱勤丘壟得灑掃尊酌且復親雖未獲
久處慙來亦所欣感此遲莫年再至恐無因各願愛體
素令德期日新

題晚香堂二首

弱志弗苟尚遂與世好殊性本愛閑逸種菊繞蓬廬時
當雪霜厲羣卉悴無餘斯花獨敷榮為我莫景娛掇英
泛美酒燕坐當前除菊可制頽齡酒能解饑飢陶然有
真樂此外奚所需俯仰天地間百年復何如寄語達生
者浮名豈能拘

靡靡秋日晏淒淒霜露零紛紛衆卉悴粲粲佳菊榮我
實幽居士適此隱遁情園林無來躅牕戶有餘清床前
一壺酒滿泛黃金英長歌散襟顏歌竟時自傾頽然既

就醉此樂將不勝微願良易足多技豈吾營余生後彭
澤千載仰德馨

送何教授奉母還臨川且省其父

秋日淒以白遊子念歸還奉母載官舫駕言還臨川王
門豈不樂所惜慈侍偏况茲嚴親在家居垂莫年溫涼
謹問候子職媿久誓今我幸具慶而可各一天故山有
高堂二老心所便豈無一觴酒跪勸當几前敢謂美晝
繡庶用怡華顛依依戀膝下眷眷懷日邊重來勉盡瘁

移孝乃為賢

乘化室

素髮被秋髯筋力與昔殊人身非金石歲月苦易徂麟
原有青山真宅預可圖穿雲斲隧穴密甃圓且虛石獸
既外列瓦棺亦中儲前立兩翁仲傍蹲一龜趺地靈暨
木伯呵護衛以驅四序自更迭大運誠須臾千秋百歲
後瞑目歸斯廬油然委蛻去此外復何虞

題愛日堂

逝景如奔流晝夜東向馳歲月諒難盡人生信有涯所
以孝子心怒焉抱深悲舉頭視慈顏已覺非昔時適見
雙髻玄于今成素絲念之益增感何由報恩私晨興啟
高堂甘旨具在茲奉觴祝親壽願共春暉遲以斯菽水
歡為彼哀莫怡去日莫能挽遐筭或可期庶幾崦嵫照
不異扶桑曦

題山水小景

野外少人躅值此佳日遲偶與二三友遊觀賦新詩青

松藹繁蔭碧草含華滋逍遙恣言笑童稚亦娛嬉濟濟
炫春服悠悠詠清沂茲歡恐難再興盡以為期

題湖山佳趣卷

宦遊愜深好乃在名勝區山水自足適况茲職文儒橫
經有餘閑逍遙出通衢春服各已成遂與童冠俱徘徊
恣言笑登陟忘饑飢晴鳬戾層空弱藻翻文魚至理與
景會天機獨吾娛悠悠仰川上眷眷懷舞雩詠歌返翬
舍高興誰能諭

梁處士挽詩一首

涼飈振庭樹殞星當前除伊人此遐逝歛衽歸玄廬
翩丹旒揚祖行在須臾衣冠閔重泉體魄寄荒墟浮生
雖有盡令德諒不渝沒世苟無述百年復何如梁鴻凜
遺烈千載與之俱

容膝軒

一室厯如斗堆床置琴書耕讀得閑暇危坐心自娛天
光在甕牖席門掛繩樞已忘朝市榮聊依野人居環堵

本隘陋於我信有餘陶然俯仰間八荒在庭除豈但一
榻外六合真吾廬即此自寬裕廣厦空渠渠

春日與高逸人行秦淮河上作

端居苦無悰今旦得良契逍遙出近郭散策淮水際草
軟倦堪眠林香醉宜憩鳥哢晴始和川容晚逾媚篠深
風葦密沙沒夕潮至野鷺渾忘機似識靜者意幽懷頗
得愜逝景苦難繫候卒晡欲還春城暝將閉因知市朝
隱兼有林壑致永言終此生涵泳太平世

金谿鄧處士挽詩

永夕少微墜伊人亦長捐蕭條薤露歌祖行出荒阡遺骸寄空木逝魄歸窮泉有生諒必死自古莫不然矧茲得高壽况乃歸其全瞑目可無憾苟生真足憐鄙哉學仙子服食希遐年

具慶堂

高門多積慶父母喜俱完兄弟亦無故妻子復團欒况茲值明時懷紱為縣官民淳衆務簡日夕閑且安命婦

金匱要略卷之三
卷一
出中房具彼飧與盤怡然一室內骨肉恒相看至養在
承順菽水有餘歡簡書諒足畏憂患何能干

徐道士安處軒

塵氛既屏絕氣宇亦澄鮮心恬境逾寂慮遣情自捐結
宇依層岩開軒俯重淵遙林含宿雨古樹帶秋烟落花
晚成積歸鳥夕知還習靜泯衆累守默息萬緣清虛固
其性聲利豈所便智黜道乃得朴返真斯全將隨鳳鸞
侶以引龜鶴年

淵明圖

閒居寡人事逍遙步里中風霜凋衆卉獨榮見孤松南山忽在眼佳菊亦成叢欣然縱遊眺况茲年歲豐幸有盈瓶酒酬勸偕老農醉來多奇趣豈必絲與桐

冶城懷古

趨朝退北闕弔古來西州忠貞結纓處松柏餘荒丘蕭條伯氣歇慘澹寒雲浮嗟哉晉多士孰奮匡君謀壺也真丈夫毅然無匹儔父子著偉烈奸諛讐芳猷英姿儼

遺祠信史芬餘休疎鐘冶城晚落木秦淮秋我來事蒐
訪往迹猶可求如何忠孝名不在曠達流誠知清談高
寧執鄙吝優同朝江左賢顓泚徒懷羞徘徊凝望久日
落長烟收

題亡羊圖

澹無組紱累夙志愛林泉挾冊驅羝羣箕踞叢篠邊玩
繹造芒芴超遙謝蹄筌微風延衆籟落日明長川心景
適相契物我遽兩捐爾羊本非闕我書亦空詮不寫穀

生博畫師無乃偏執業雖各途亡羊奚異旃固知東陵
愚豈及西山賢徇名與徇利均死何後先棄置且勿較
呼兒進杯棬

哀蕭教授引之

銜哀讀銘誄悲淚若河懸念我同門友于今在九泉契
濶雖云遠情好乃逾堅都門送別時何意遽長捐達宦
每在晚朝露竟湔先一夕成長往二脣仍各天枯骼委
烈焰餘燼藏墓田人生孰無死禮葬固所賢等為歸腐

朽終當隨化遷所以曠達士形骸豈復憐佳名苟不沒
詎必分烏鳶

題王司直所藏米南宮畫

幽壑霽殘雨飛雲晝濛濛大江瀉練遙上與銀漢通村
墟極平壙島嶼迷西東長林隱空舍衆籟吟天風懸崖
忽焉斷浩蕩烟濤雄夕嵐落霞外把釣何老翁流水共
情性沙鳥知心胸浩然滄浪歌濯足清潭中始知簪紱
華不與漁樵同興適隨去留身閒忘達窮我生本放浪

中年抗塵容觀圖思初服脫屣期息躬長揖鳳鸞侶永
投鷗鷺蹤自此卸銜勒郊原春草豐

題十八學士圖

慨觀瀛洲畫經濟懷羣公唐宮委蔓草寂寞昭陵空天
策舊多士猶餘圖卷中乘時翊昌運磊落皆豪雄論思
過丙夜魚水欣遭逢輝光驚時人文翰動九重粉繪勞
相臣褒詞煩褚翁白雲鶴笙遠即此真方蓬勛業豈弗
高聲華亦云崇終然太平治所媿乃國風謀謨匪無材

金史卷一百一十五
卷一
王佐自不同邈哉夔契輩誰能寫其容

獨酌有述

沈憂如積疴紆鬱劇焚燎深在膏肓間異鏡諒難照往
聖垂方書萬病皆有療獨茲莫措手渾沌無朕兆嘗聞
達人言掃滌酒其要呼妻倒空罍數斟飲輒醕頓覺胸
次豁豈懷醺酣詎頽然百慮忘濁醪信為妙

秋日寄鄉中親愛

秋氣慘以慄涼露日淒其感時憶親愛惻愴增遐思迢

遞隔山澤悠悠各天涯念昔為舅甥于今成路岐逝者
間存歿生者傷遠離奈何綢繆意中道失所期復茲邈
千里會合知幾時撫事但心折懷舊空神馳願言垂暮
景黃髮臻期頤

翠爽樓

幽居遠城邑山水有餘清層樓據其勝登臨怡我情曲
闌無人來卧起時獨凭空青襲琴書濕霧飄軒楹薰風
滌煩襟好鳥相和鳴景物能解顏濁酒聊一傾油然既

就醉意適心自平多財信為累達宦真虛名且盡今日
樂明日非吾營願言在槃澗養素安餘齡

秋暑述懷

局促過長夏荏苒屆秋期初謂火既流涼飈掃炎曦豈
料殘暑酷乃爾不可支我膺徽纒纒下共卒伍馳弱骨
苦汗漬弊衣歎塵淄一身方在公寧復顧爾私雖無案
牘勞莫任奔走疲幸茲城南殿頗與靜者宜時來解襟
坐偃仰暫得怡我家文江上先廬有遺基何當乞骸去

結茅樹桐椅期與世塵絕永隨樵牧嬉懷哉果何日浩歎徒獻歎

甲午九日病中作

謫官久于役俯仰成陸沈豈顧歲時邁但憂才弗任如何孱弱質茲復病見尋蕭條卧空宇四壁但蛩吟山妻忽相謂重九今日臨欲沽東隣酒垂囊久無金而我聽此語浪然淚沾襟婦云奚所為感慨亦何深拭淚向婦道爾豈知余枕老親隔千里兩髯吳霜侵十年違菽水

慚彼返哺禽縱匪在憂患有酒寧獨斟妻亦重灑泣悲
感不自禁婦人亦人子豈獨丈夫心

秋日登雨花臺

茲臺創何代遺址對遠川雨花不復見蔓草空翳然今
晨逐徒侶偶爾凌其巔一眴周四顧梵宇相蟬聯黃金
佛鑄像玉塵僧談禪側聞身毒教本自哀顛連誰哉繼
虞愿浩嘆秋風前

遊朝天宮示同行道者

琳宮啟森爽蕩蕩寥陽天神君司雷霆見者皆肅然翊
衛儼六丁陟降來羣仙空歌發遙唱秘笈開洞玄鳳扶
五老駕龍驂列帝輯造化非形求道妙豈言傳希夷有
像外溟滓無始先願隨鬱羅翹稽首太上前

蔣節婦

蕭蕭斜日夕肅肅悲風寒涓涓苦淚滴寂寂孤燈殘昔
為比目魚今作獨宿鸞捐生下相從一死諒非難妾身
豈足惜老稚誰為看節義古所重貧窶敢不安庶幾泉

路魂瞑目少自寬泰山或可移海水亦有乾惟應天上
月長照妾心肝

謁卞忠貞祠

粉署得休暇偶登冶城巔令公有墓道灌莽浮荒烟遺
容儼鸞鵠盛服嚴貂蟬褒贈卹典重報祀時薦蠲緬懷
臨難日力戰操戈鋌君臣義所重父子軀同捐豈伊一
門間卓爾忠孝全晉士輕節槩放曠尚虛玄宜含瓦石
者視死猶生年炳煥留盛名上與星日懸豈特式臣庶

端足扶坤乾嗟彼負國徒亦拜祠堂前後來建康倅允
矣希其賢

題靜觀堂卷

嘿處在林居沈冥遺世榮大哉靈臺妙止水湛澄凝括
囊視羣動擾擾紛自營細草沿虛砌佳木蔭前庭慮空
念乃息欲淨理益明如何驅馳子終日沽其名清尊有
醇醪幽居無俗情醉來澹忘言養晦樂餘生

望方山有懷

金方四月二日
卷一
茲山如匣印整特臨都門傍顧衆峯少遙依鍾阜尊烟
嵐結空翠泉石生清芬木秀澤時雨鶴歸投暝雲幽棲
絕俗士游衍皆仙羣不見謝康樂我懷誰與論

讀道書作

疎林過微雨綠葉當窻垂緬彼古仙者秘言良難窺晝
觀探其蹟中夜夢見之玉色龍鳳質金章鸞鶴姿稱云
瑕丘仲疊疊示端倪玄理貫而徹素心欣以怡伊余烟
霞性早歲慕無為驚悟但虛室颺輪那可追

謁趙文節公祠堂

烈焰不容熄玉石俱凋傷宗社震蕩中大地多傍徨國
祚條云移成命真靡常興替雖有數節槩焉可忘明公
倅大郡派系分天潢英氣凌雲霄高操橫秋霜俎豆固
所聞軍旅非所長守土職攸重固當死封疆小君賢伉
儷秉志與頡頏豈伊粉黛姿乃有鐵石腸所以顛危際
賴之植三綱精忠嫺卞壺廟貌儼相望義比華嵩峻名
齊日月光英魂在帝傍時復臨舊鄉何代烈士無豈獨

張睢陽

曾氏三貞堂

客行蘭溪上有屋甚煒煌借問誰所居云是世節堂世
節果何為一門凜三孀三孀本一姓婉婉金玉相父兄
實佳士夫子各才良于歸期白首中道俱淪亡韶華豈
弗念夙昔佩禮章捐生以相從之死庸何傷此身寧足
顧老稚誰扶匡節義古所重焉敢違綱常無貽九京羞
旌表非所望一孀逝已久二孀政康強存者膺孝養沒

者留芬芳而客聞此語流涕忽沾裳寄言觀風使采之
獻明光

經浯溪讀元結大唐中興頌

平生念浯溪鐫鐫有遺跡揚舲泝湘水登臨覽來即穹
崖倚層雲奇險自天闢漫叟詞既嚴顏公筆無敵鬼神
屢呵護風雨長洗滌忠槩儼尚存水街猶可識端容歛
襟讀感慨重心戚誰畫靈武謀大物取何亟唏嗟中興
業諒重君子惜逡巡解舟去回顧三歎息

曲江拜張文獻公祠

嶺海號多士開先始興公大名照宇宙信史書勲庸遂
令曲江重婉美中州崇精誠日星貫俎豆春秋隆緬懷
廊廟上蹇蹇王臣躬指茲逆豎首碎此干將鋒天高聽
雖卑竟莫回九重薊野聲鼓動蜀道埃塵蒙範金肖遺
像褒贈勞淵衷顧瞻祠堂間尚識風度雄白羽寓微意
金鏡懸孤忠先覺百世師景仰無終窮懷哉秉鈞者孰
與公心同

遊柳山書院

休政違炎方返棹及清湘
考圖訪前跡懷古陟遠岡
禮殿丹堊彫雘亭棘榛荒
既感時代異亦憐俎豆亡
蘚深碧侵堦蘿密青蔓墻
雉鴟有翔集衿佩無趨蹌
陰菌依座秀晴蕤沿澗芳
豈伊誦絃地而為樵牧場
撫俗思賢哲繼軌念循良
視廢余誠忤舉墜職所當
南藩如重踐庶或夙心償

張節婦

金史卷一百一十五
卷一
昔與君結髮綢繆百年期奈何屈中道而有死別離相
從固云易九殞分所宜殘喘匪自惜呱呱誰抱持姆氏
夙有訓敢或違天彝明明夫子魂泉下諒有知少為張
家婦老作張家嫠先姑炳遺烈誓欲與等夷他年樹雙
表大字旌門楣

重涖汴藩示流民

汴藩控西北水陸咸此會太行如長城畿業壯藩衛黃
流自天來蕩滴勢何銳土壤多肥美風俗寡浮偽云胡

遽凋弊徵調靡寧歲富者化貧窘窶者填溝澮十室數口
存一戶百徭萃婦人廢蠶績杼軸悉空匱丁男應夫匠累
載負租稅偷生既難期逃竄非所畏嗟我忝旬宣重臨益
驚悸勞來固迺職夙夕思盡瘁庶幾解倒懸疲瘵少甦遂
矧茲聖明朝屢下寬卹惠苦語示羣氓歸哉理荒穢

九日郊縣小蛾眉山拜二蘇先生墓

風厲羣木落菊萸涵露清令辰屆重九促駕仍遐征
逡巡及僧舍整拂塵冠纓懷哉宋二蘇此地餘荒塋石人

金匱山房集 卷一
俱摧仆壘土相將平趨祠拜遺像祇薦陳芳馨緬彼蛾
眉山西望千里程茲丘亦何謂云胡冒其名徘徊眄林
壑恍若聞金聲感彼詞垣仙托此舍衛城文章白日麗
忠槩秋霜明徒令後來士仰止生深情

蝻塚

七月月生魄蝻出溱洧傍始焉學躍跳倏忽羽翅長所
過赭郊垆矧復遺稻粱坐令飫飽腹立化饑餒督民
殄斯類晨夕紛遑遑隳突踐壘畝炬火明山岡燎焚弱

質燼撲擊微骸僵卒夫載朽齒絡繹持宮筐穿穴掩腥
穢作塚官道傍罪浮彼破鏡雖死安能償蝮蛇實搖毒
已疾傳醫方蜜蜂誠小物亦解奉其王畜蠶必吐縷世
賴充衣裳畏蚊恐嗜體幃幕席與床青蠅奚足憎赤蠱
應可防編竹蟻知報勤誦螢聚光致雨蜥蜴驗起痺全
蝎良原性殊善惡稼穡咸無傷惟茲口吻酷黍稷爭先
戕乾坤百虫夥去爾庸何妨吾將告宰造投畀魑魅鄉
從今樂耕鑿歲歲歌豐穰

金文四庫
卷一
崇福宮禱雨

清曉戒徒御禱雨謁道宮
焚香古帝前拜跼肅以恭
因之感興亡華構久已空
尚有勅賜碑狼藉蔓草中
慨想宋全盛鑾輿屢遊從
名臣領祠職列辟儼眸容
運往物隨改偉觀難再逢
登臨睇烟霞頗愜眺望悰
遲回不能去樹杪來長風

觀啟母石

夙負山水癖苦乏幽討緣
幸茲崧與少秀色當眼前
公

餘陟峻岡忽覩石一卷特立四無隣觚稜不相聯云是
啟母身化在郊墟壖呼之乃擘裂啟出仍完全幻語本
荒唐昉見淮南篇遐想覆載間滄桑屢更遷安知運代
移墜彼千仞巔厥理誠可推賢達固釋然矢詩正妖訛
昧者庶或悛後世有豪傑為我焚其篇

端午日遊少林寺

少林聳岩堯有路達蔥嶺半生懷勝槩老乃賤真境緇
流遠見迂偏袒仍露頂升高縱遐觀頗覺癡緣屏蒲風

翻卷帙艾色侵衣領掇蔬僧具供飲騎童汲井自拈清
淨香作禮藝古鼎超超昔神師順寂同溟滓而於片石
上留此不滅影竺夏雖異轍皆貴能猛省寒岩許分坐
禪定畢餘景

題王生卷

王生事衆藝厥藝非庸常字格既超俗醫名將擅場揮
翰縉紳前懸壺闌闌傍時時拂華箋流麗兩三行勁健
束筋骨端圓歛鋒銑硯池墨波翻樂闌杏陰涼家藏總

秘帖囊貯皆奇方勉力當師承蜚英期頡頏誠心見焚
券清致歸文房八法右軍最諸科思邈良籠鵝與伏虎
萬古同垂芳

題雙燕圖寄表弟陳安行

君家吟溪北我家郡城西君家梁間燕我家梁間棲我
從出鎮來寒暑又三變不見故鄉春惟見故鄉燕挈家
吉城邊寓家汴河湄燕識主人心相隨不相離念君千
里隔見君幾時得欲令燕銜書飛歸到君側君能弗吾

棄為理白雲莊願言共君老看燕雙飛翔

雪中偶至相國僧舍

精藍創何朝規制極殊勝閻浮罹劫火無復莊嚴盛惟
餘白足僧短褐露兩脰我於大雪中獨立偶乘興難尋
金布地頗訝玉為徑娑婆絕塵翳似得天眼淨冷冷梵
唄音細雜饒與磬欣然遂忘返宿留逮昏暝乃知向上
機無臺亦無鏡徒勞費辭說妙在悟自性世無毘耶翁
孰拯衆生病願言投空門跏趺事禪定

夢萱堂

憶昔種丹棘期以怡親衷親亡故物在徒使增悲悰朝
觀夕仍對詎料精誠通忽從枕上見宛與生存同欣然
載言笑睇彼堦下叢森森鵲背英相映慈顏紅芳莖挺
清脩嫩葉紛蔥龍爛熳五采服煜比花色濃宜男既非
望且遂忘憂忡驚寤忽無覩寥寥書室空想像抱沈痛
淚落如流淙起視北堂植青青涼露中

青城懷古

炎宋尚簡質郊丘布為墻九門謹闔闢萬卒嚴周防暫
置弗勞杵權施豈須隍綿延逮宣政驕盈更典章版築
易縷製墉壕固金湯袞龍狩沙磧泥馬奔錢塘奢侈諒
宜戒播辱尤所傷陶匏薦明水維馨仰前王

林亭遠眺卷

雙親久淪逝遺櫬空山藏歲月諒已遠撫昔增感傷儀
刑渺何之想像空徬徨悠悠人子心沈痛何時忘虛亭
縱遙覽竹樹森微茫輕雲歛還舒列岫紛低昂岩松布

清陰溪艇浮滄浪騁望極遐曠白首在異鄉邈茲九京
隔慨歎徒深長行行更回顧淚下沾衣裳

老大心易感鞠育恩難酬顧瞻青青山高塚山西頭憇
茲灌木陰眇眇馳雙眸含悲睇天末若見墳與丘茅亭
依水石屢至成淹留蕭蕭風樹枝欲靜不自由哀哀烏
鳥情纏綿終靡休焉用徒耳為顯揚慎所修移忠古攸
貴往哲有令猷

先龍違別久蔓草迷荒墟豈不念灑掃道路頻馳驅獨

懸一寸心怵惕霜露餘王門固可樂窈窕長裾旨甘
亦云足弗逮將何如孤懷倍惻愴引睇西城隅洪濤曷
能度疊嶂諒難踰歸飛乏羽翼注目空踟躕中和益代
英玉質神仙癯詩畫兩精妙風韻天然殊熙春富詞藻
字字皆璠璣允為世三絕勗爾當珍儲

重慶堂為錢儀賓賦

客行大梁道華屋枕道傍借問誰所止閼闕何煒煌居
人笑答言此謂重慶堂就中兩遺嫠同志如雪霜賢孫

英俊姿遴選賓天潢膳調三鼎珍樂奏絲與簧笄珈儼
成列冠珮肅分行趨蹌二親側次第進杯觴百務弗相
干暮齒彌康強家和福乃臻四序來禎祥玩匪宜男花
心怡自憂忘姑耆婦仍壽鈞享百歲長客聞遽前拜重
是雙貞良豈徒垂閭則庶以敦綱常

送楊郎中催馬草還京

大梁據中土自昔風氣旺北邙殊蜿蜒太室極雄壯黃
河貫其間浩浩恣奔放四野開平行桑柘綠相鄉丁男

事耕耨姑婦治絲續菽麥盈倉庾醕醴溢盆盎近歲頗
凶屯旱曠歟農望念茲饑餒餘十室九鰥曠長貧負租
稅遠役困夫匠督芻實賴公區畫咸適當深體堯舜心
推仁憫凋喪叱咤尚弗忍矧肯施鞭杖愧余謏劣才旬
宣乏善狀竭力奉寬條庶減疲瘥恙贈別陳民囂冀君
徹卿相

擬古

玄穹惟湛寂元氣斗斡旋時序相禪續陰陽無忒愆乾

綱后攸則庶政相斯專明良職其職四海自熙然
吾觀日與月乃是陰陽精彼升此攸降循環有常經萬
方仰臨照元良則其明離躔遂晦蝕惟辟修德刑玄象
雖緬邈人當思戒懲

園綺遺世賢逍遙商顏巔安漢笑談頃視之何易然拂
袖謝隆準採芝茹芳鮮今復有斯士吾將為執鞭
黔婁貧賤士懷道棲衡門布被斜可殮曾西徒失言終
焉諡康子萬古播清芬云胡有千駟歿世寂無聞

吾觀古顏孟生民之先覺已克禮斯復陋巷亦云樂氣
由養而充浩然塞寥廓其歿餘千年載籍猶昭灼天爵
良可珍簞瓢未為惡

方寸湛明鑑賢愚罔弗然浸淫汨私欲沈溺陷危顛善
性寧終昧清光應暫捐勉旃力磨治皎潔當如前

芙蕖開清池花葉相掩映粲然薰風中容色自娟靜瑩
同淑女姿直類君子性豈不念春華榮悴分攸定奈何
徒狂馳竟日事奔競

蹁躚一黃鶴飛止弱水宮青鳥戴勝使側目不相容遂
遺瑤池跡遠寄滄海蹤無心隨鴻鵠任爾摩層穹

聞昔有逸民風標何峻拔超然凌雲霓遐視九垓狹跡
雖戾中道心則忘窮達其人諒可希前進脂吾牽

索居人事寡窮探墳與丘多謝東鄰客頻來為我謀乃
為儒冠誤富貴別可求首干中常侍次謁北平侯捷哉
仕宦徑貿貿不知由讀書果奚益辛苦被時羞我笑而
相答志殊各自求蕭條老布褐道在復何尤

憶昔中園裏樟楠柯葉深芳葵種其下幽鬱冒繁陰靡
瞻朝暾出鮮艷夕景沈縱昧昏旦候寧殊傾附枕小草
本非異懷忠性所任誰當抑蒙翳庶遂向陽心

森森鄧林木四序恒青蒼隨材就掄擇規矩因圓方其
中有孤檜膚理尤堅剛挺特寡附麗辛苦受雪霜含章
少外飾莫廁棟與梁美哉連抱姿而弗登明堂永惟松
楠侶恥在槐樗行志士不苟屈撫樹空徬徨

我本賤貧者棲棲在蓬茨蓬茨何所樂吾心自孳孳人

言青山巔玉髓閔在斯服食仙立成深慚稟凡姿何如
任其性雋味古文辭仰止曲肱叟舍此吾誰師

荒哉煬天子縱侈樂無涯彛紀胡可瀆同心賜宣華獨
孤雖云誤勇才亦非佳楊梅枯已久撫事令人嗟

題闕

先生篤行士小隱南麓邊芥視功與名遺棄如浮烟造
門非俗流問字皆英賢室空長物無匡床但青氍毹世受
靜春學潛心最精專所以絕外慕昕夕勞鑽研斯文誠

在茲樂矣卒歲年海寓忽鼎沸羣氓弄戈鋌渠魁何狂
愚馳書敢相延奮袂拂然起仰首呼青天誰為奪我志
清白世所傳洒然攜琴劍樂道鑒魚鳶從此勿相逼清
風激寒泉當此喪亂際三綱賴公全磊落貞松姿霜雪
愈挺然九京不可作星日芳名懸因詩寄深衷歎息顏
陽前

題方方壺枯木竹石圖

空山百尺樹質性何貞堅夭矯修篁側寂寞磐石邊亭

亭任重姿屹立思擎天造化偶遺棄值彼蓬萊仙寫之
若憐才崢嶸老龍騫朔風振羣木節操欣獨全寄言玩
物者毋貴春花妍

顏用正挽詩

幽棲忘聲利抗志惟雲泉澄神以內照白首甘草玄既
混釣耕侶詎希冠蓋賢魄化名未泯塵疑榻尚懸服膺
先民訓委順安其天誄文太史述遺經門人傳息蔭樹
繞屋資生瓜在田掩棺諒靡憾况乃獲歸全孔曾皆一

輟此理豈今然

哭子

余齡及中歲有子生六年疾痛母心惴寒饑我懷煎鞠
育愛雖切薰陶教宜先數日近方解誦詩未能全賦齡
亦何短夭閤輒棄捐觸目恨山積沾衣淚河懸世澤懼
斯斬書香賴誰傳嗣續人所重念之增惕然修已安義
命吳穹諒無偏明喪笑商鄙情鍾慚衍賢螟蛉信么麼
在物亦堪憐

夏末偶尋洞惠道院

曉起涼月淡絺衣坐肩輿灑然塵慮豁遂即道者廬蕭
條殿廊存亭軒化荒墟山門憇樵農蘚砌鹿豕趨雷傾
有墮瓦樹伐無遺株仙家尚消沉况乃俗士居蓬萊屢
清淺此事諒弗虛吾聞至人言一氣運化樞莫窺機絨
微孰外定數拘通由饑亡命載以賄喪軀榮華豈久在
役智悲羣愚

洞章二首

縹緲大梵境玉京何寥寥空洞無色根泛兮若浮飄陽
精鎮朗耀豈復知昕宵燿燦丹霞中浩歌白雲謠一聽
衆緣息再聆羣累銷劫運自茲度稽首登神霄

浮黎始上青浩氣長空濛溟滓窈無朕端倪那可窮梵
川玉虛界不與諸天同羣仙時遨遊翳鳳駕赤龍年壽
罔有極莫能測其終泛詠黃雲裏肅侍彌羅宮

題翎毛畫贈葉太守

名郡太行北水陸當要衝舟車日旁午來往無停蹤民

貧困迎送矧值歲罕豐繼縷衣百結藜藿恒弗充前年
太守來遴選出聖衷下車亟摩撫昕夕勞其躬還珠及
渡虎有待臻全功我昔因入覲道經淇水東解鞍憇驛
舍桂樹空庭中有鳥鳴樹間其雌和其雄物既適至性
人猶含苦棕尚期盡生遂和輯比鳥同庶令盛明代再
見黃與龔托畫表深意寧論描寫工

丙寅端陽述懷

歲月易流邁佳辰屆端陽閑居昧時序節日如平常空

園積雨霽蒿艾如人長蕭條掩關卧蝶夢方悠揚老妻
喚我起盤飮勸我嘗小孫頗慧黠學語聲琅琅舉目見
之喜欣然揮一觴儉約固予分泰侈非所望冥觀陰陽
運隆替乃其常吾生幸休退用舍安行藏前修有善訓
岐路多亡羊且復醉蒲醕毋將憂自戕

丙寅初度作

余生如稚松由寸望百尺既承雨露滋亦受霜雪積蹉
跎踰七十勤苦曾備歷誤蒙明聖知謬忝中外職顧已

慚菲薄於時之裨益處盈虧必隨履泰否斯即至理諒
在茲昧者固弗識叩閣乞殘骸休退恩旨錫遂令犬馬
軀獲返田野跡長揖盡省僚重負從此釋今辰屆初度
厨傳仍岑寂傍人競嗤笑窮約猶曩昔妻孥頗愧赧而
我固悅懌平生守儒素晚節敢變易回思永樂初歲月
類梭擲同年四百餘多已在鬼域存者纔十輩猶被利
名役迂踈獨何幸林下得偃息遺榮遂安閑養靜忘跛
蹇游鱗泳清波羈鳥歛倦翼貧非吾所憂病豈吾所戚

寵辱與升沉寧復置胸臆忘機侶鷗鷺植杖隨沮溺浩然天壤間俯仰惟意適長歌自為壽坐對遠山碧

亡友舒州通判張君哀挽詩

我昔遊禾州英俊森跌宕衆中昉識君彼此年盛壯定交文字間傾倒已見諒推能實居先論齒仍在上既欣氣味同復喜懷抱曠溫溫璞玉姿浩浩江海量豈惟邑校雄允謂士林望及門師易菴卒業侍函丈大哉四聖經研究彖與象裒然西江魁足繼宋陳亮諸生老場屋

顧泚羞倔强詞垣七八年葭玉得倚傍編摩互論討疑
惑共咨訪但期荅君親未省謁卿相佞色從古鄙直躬
豈今尚始屈倅邦畿翻能拯民恙公平村有謠苦澹宦
無況何期寒窶家忽被仁惠貺云胡去郡亟遂使失保
障一官滯房山連歲董夫匠令名諸公推敏識多士讓
政須峻陞遷溘爾遽周喪呼天邈不聞為善匪可仗縉
紳競悼傷輿隸亦惆悵而我忝深知肝膽兩相向切慙
失箴規磨琢廢鑢盪情捐骨肉親序缺兄弟行前修不

可作後進日流蕩哀哉若人亡士習趨謬妄紛紛夸毗
子翻覆千萬狀譬猶蟻附腥繚繞沿甕盎疇能遏頽波
奚忍鼓其浪孰知余心悲孤立誰我相令儀隔幽明清
夢勞想像作詩述初終老淚恣橫放

春湖黃處士挽詩

富順山水好春湖更無雙波瀾勢浩蕩昕夕聲淙淙黃
公英特士奇氣未易降揭茲以自號傳呼遍鄉邦雅懷
樂幽勝臨流闢軒窻課兒夜讀書短檠燦銀缸六經窺

交輿百氏刪紛吮魚龍每來聽出沒相舂撞有時岸綸
巾隴頭看飛龍有時狎鷗鷺沿洄棹輕艘彷彿盤谷李
依稀鹿門龐幾年厭世去高墳屹崢嶸苔蘚翳翁仲松
筠列旌幢芳名煥九鼎千夫莫能扛遺澤豈終竭深長
配岷江伊人逝已久挽歌富新腔豐碑著潛耀尚待筆
如杠

題感螺詩卷

敘州富順縣孝孫有黃璿弱齡方及紀至性出自然祖

母久遘疾伏枕嗟沈綿絳宮鼎沸溢榮衛熱相煎飲藥如飲水終劑弗少痊頗思泥淖螺煮食或可蠲時當十月末凜如沍寒天陂澤各已凍此物求無緣孝孫默致禱徑走南塘邊南塘路迢遞心急足不前匍匐至其處解衣漉清漣果獲四十餘紺若佛髻圓持歸更滌濯爇火烹甘泉調以醢與醬芬香絕腥羶病者見之喜飲啜隨下咽燥煩遽脫體貼危遂安全乃知一念誠可以格上玄造化宰報施錙銖寧使偏孫今陟顯位實秉郡守權

茲事諒非妄詞林鉅公傳矧伊職師帥表率宜身先永
言錫爾類詠歌繼朝賢

題張教授居易軒

行已素其位彰彰先訓明美哉留侯裔守分息營營執
經侍彤郎講讀傾忠誠一室無羸積四序有餘清孰云
祿秩薄豈受吏事嬰財豐真為累官達仍貽驚惟當樂
夫天優游心自寧永言慎終始俟命歌隆平

別子欽劉同年

廬陵漢名縣黌舍當城南粵從宋慶厯傑構何潭潭穹
碑泐學記歐子親題銜所以富才彥挺然皆梓杉游歌
我昔忝遺經事窮探英俊非不多畏敬踰四三子謨與
德讓奮起師易菴晨夕久薰炙化雨深濡涵王門職輔
導胄監莪弁簪引之絕溫潤欽止精研覃之宜暨仲舉
問學青於藍惜未及貴壽早終四子咸篤實若陳李磊
落俱奇男雄藩佐邦伯經筵進封函就中最傑特子欽
丈不凡壁經世授受道腴恣沉酣聲牙古盤詰同異互

訂叅他人悉窘步君獨行耽耽翰林俊聲著粉署刑名
諳冰蘖豈論苦澹泊夙能甘擿奸若風厲讞獄同春含
譬之龍泉劍光焰不可緘契濶五六載相思隔烟嵐追
懷舊遊地幾度聯歸驂茲焉幸一會壯志仍巖巖胸襟
豁湖海論議森戈鋌藩臬諸鉅公招邀列罍壘肥牲刺
羊豕佳味羅蛤蚶鱠鮮旋烹鯽醢美細鱗鷁玉棋圓疊
蔗金丸滿堆柑蔬茹剪霜韭竹萌掘冬筍酒渴漱茗飲
齒寒嚼菹蘓叨陪接几席答問吐鄉談清言霏玉雪傾

聽我所貪疊疊續弗絕有如吐絲蠶握手萬里外綢繆
樂且湛胡為又分袂行李僮僕擔于時一陽復兩鬢風
毯毯東坡昔跋涉渡海再遷僭未久即見召還朝貌逾
慘寂寥數百載繼武惟子堪歲寒見松栢大廈待棟楠
賦詩寫繾綣空言只增慙情深覺詞贅此意諒余監

枇杷晚翠

江南有佳植名列果品中仙郎乃獨好官舍親培封亭
亭異衆卉秀茂當嚴冬深綠冷逾茂繁青寒更濃滿樹

葉蔥蒨陰森密成叢歲晏不改色傲睨雪與風所以玩
物者愛比松柏同灌溉役輿隸賦詠勞羣公人物兩奇
特永言播無窮

即事

功名事恬退求志在雲泉性本寡諧俗遂此遺世緣瘠
壤百餘畝草屋數十椽耕耨有閒暇北窻高枕眠人生
慕富貴方寸徒憂煎百年諒能幾倏忽成華顛種秫釀
美酒庶以醉自全

題商山四皓圖為陳徵士致廣題

昵昵戚姬寵膠膠如意憐壯哉盤石基凜將殞而顛睿
志慝深惑嘉猷忌讜言輔臣謀已拙壺闕憂徒懸遐飛
四威鳳千仞來翩翩賴以為羽翼大本安且全翻然振
歸翮遙想商山還茲事已云遠高風圖畫傳

運甓漫稿卷一

欽定四庫全書

集部

運覽漫稿卷二

詳校官編修

臣程槐

中書

臣

劉源溥覆勘

總校官庶吉士臣何思鈞

校對官中書臣李荃

謄錄舉人臣孫炯

欽定四庫全書

運甓漫稿卷二

七言古體

郡庠古柏行

明 李昌祺 撰

泮宮翠栢真奇特溜雨霜皮古銅色共傳賢守李侯栽
年數于今過三百幾經劫火幸仍存草木猶依聖教尊
清覆講堂閑永晝密籠禮殿翳香雲芳根長托絃歌地

壇杏庭槐共生意春風搖影漾宮牆
午日流陰上庭砌
博士鳴顰散學徒競來樹底縱歌呼
喬柯寧集接輿鳳
細葉爭巢朱博烏却憐種者今何在
留得青青表遺愛
文風化雨沾濡深從宋厯元逢盛代
上摩北斗凌中台
時有佳氣相徘徊大哉宣尼後凋訓
珍重明堂梁棟材

潢溪釣者逸閑軒

白髮潢溪釣游者半生浪迹棲林野
已慣為農夜飯牛
寧能執策朝馳馬只知物外無喧囂
養花種樹東津橋

縱橫坐席雜樵牧傾倒甕盎忘晡朝醉來就床且高卧
一枕從教日西墮蓋世功名逝水流薰天富貴飄風過
烟霞泉石聊徜徉青雲要路非所望乃知靜處有真樂
却笑時人何太忙

陳上舍所藏蔡主事墨竹

粉署政閑聊自怡運毫濡墨寫竹枝宋時二子誰最好
今日諸公君獨奇露梢風葉新圖裏蘂色脩脩紫鸞尾
郎官醉筆掃將成上舍高情得之喜明窓淨几絕纖埃

嫋嫋長竿若可裁
白晝閑將堂上掛
丹山定有鳳飛來

高道士所畫山水

伊誰丹青擅能事
畫出羣山與山似
樹杪如聞雪瀑泉
林間疑有雲門寺
杖藜橋上知何人
抱琴可望不可親
高師指點笑相語
我昨圖成殊逼真

賦得小孤絕壁送人還鄉

海門砥柱長江潁
東南羣流皆下經
蕩摩霄漢壓溟渤
鎮控吳楚資神靈
百丈懸崖寔奇壯
銀濤雪浪相舂撞

層巔俯視飛鳥背曲徑斜通白雲上中有重淵龍伯都
瓊宮貝樓如玉壺天晴蜃氣秋成市月冷鮫人夜泣珠
羨君歸去過其地政好登臨騁遐睎賈客爭祈天姚祠
妖巫謾設彭郎祭解纜開舟肯暫停乘風破浪如流星
明日思君不可即天涯惟見此山青

送周大尹復任清河

分陽令尹宜峻遷銅章墨綬却仍前東風上林白鼻馬
細雨韓橋畫鷁船桃源過來是花縣聞道吏民懷宓賤

別處城下草生初到時邑中柳舒遍奔流忽見濁清痕
岸上人家是郭門鬱葱王氣濠梁近迢遞官程淮汴分
羨君佳政人不如兩臨百里馳芳譽剩將此際循良蹟
留待他年史館書

送張教授改任鳳翔

客舍暄愛日旗亭冽霜風故人有遠宦策馬之關中識
君今餘十五載幾度思君夢華采別後音徽煩屢寄交
誼重逢不曾改似君才調世豈多手援健筆如揮戈門

生問字每載酒道士寫經頻送鵝九年作官南海上文
與波瀾相浩蕩今為冷椽向鳳翔岐山渭水周故疆隴
雲秦樹真可畫絳帳橫經復閑暇座上青氍自足娛眼
前白髮何須怕我本踈狂跡不羈與君情好最相知殷
勤不勸盃中酒寂寞徒吟卷裏詩

琴清軒

野客本冲素瑤琴何靜淵層軒久絕俗士跡綠綺自上
朱絲絃初彈徵調聲古淡澤國葦寒鳴旅雁再彈宮音

如迸泉冰盤亂走珠璣圓斯須改調羽仍角灑灑明珠
相續落秋冷瀟湘見斷雲春和鸞鳳鳴阿閣吾聞伯牙
昔善琴後來不復傳遺音如何到處聽者少悠悠山水
空高深銀箏錦瑟人同喜流蕩娃淫悅俗耳衛國誰知
擊磬心齊門孰識吹竽恥三尺焦桐只獨怡希聲大雅
世豈知但令妙解微絃趣不必黃金鑄子期

送劉博士從征交趾并貽梁御史鄧主簿

沛中才子容臺客半世經行遍南北去年隨駕獵長楊

今歲從征破殘賊從征還得侍青油中軍帳前叅密謀
盾上頻看草文檄軍前屢見獲俘酋梁侯鄧簿皆同調
對酒筵開能謔笑綵筆宵成露布辭紫泥曉下班師詔
論功大將畫麒麟先數風流幕下賓豸冠行拜勞還寵
烏府仍稱獻納臣

湖山佳趣歌

半生甘作隱者流兩屐不到侯門遊老去高情付林壑
閑來樂事只漁舟春水泛花漾孤嶼杜衡靡蕪滿脩渚

晴樹遠連江上村，晚雲忽作溪南雨。
自憐身世兩悠悠，濯纓濯足忘吾憂。
萬鍾懸爵本非志，一竿在手何所求。
門前學種五株柳，逸興雅懷到處有。
對客石床撫古琴，留客山瓢斟濁酒。
年年歲歲適閑情，皞皞熙熙度此生。
已無天上鵷鸞夢，且結湖邊鷗鷺盟。

蘭秀軒

聞種幽蘭在庭際，爭秀競芳如謝砌。
客來談詩坐高堂，入簾飄席但聞香。
宣尼綠綺寄三弄，屈子離騷歌九章。

歲寒不凋復不悴夏芷冬蓀寧足貴此花芬馥淡且清
願爾諸郎同德馨善人比潔真無媿燕姑為祥良有徵
風輕露冷美閑夜更愛國香長遶舍軒中有蘭人好看
圖上看蘭空是畫

送缺生還鄉

羨子翩翩世莫測三十今猶隱鄉國陳平非是困長貧
賈誼終當射奇策于今應暫賦閑居釣水樵山心自娛
甘旨時供二親養燈窓夜對一床書昨日公車召尊府

卷二
青雲有官未曾補天涯豈但鞅掌勞膝下惟知別離苦
歲月蹉跎會面違回頭又復念重闌柴門落照迎歸客
童稚升堂競挽衣有才勿向山林老功名在人須及早
胡為寂寞環堵中窮巷年年長秋草

題徐太守所畫掀蓬梅花圖

紛紛卉木凋零早獨有江梅冬更好天寒歲晏風泠泠
野橋無人流斷冰南枝爛漫北枝少恍如玉貌千娉婷
酷憐隨月印沙影更愛臨崖近水形當塗太守今黃霸

名重華光補之亞酒酣自寫復自題餘子持縑終不畫
初開盛吐俱含態將飄乍落皆有情玲瓏輕霰簇鏤玉
蕩漾明珠疊碎瓊昨來盧君新卷裏寫得長梢最妍美
踈葢凌寒似得春暗香撲鼻疑生紙世間畫手多凡流
惟數徐君筆最優不必掀蓬棹飛雪觀圖何異在扁舟

送周生還文江

周生磊落志不羣餘子紛紛那足論書香道國先賢裔
宦譜平園丞相孫少小聰明已堪惜烟烟雙瞳剪秋碧

當代諸兄固罕儔往時嚴父真勍敵江鄉屈指擅聲稱
青雲步武宜相承致身要展胸中畧閉戶宜窮窓下經
男兒猷為貴聞早萬事無如盛年好佇看唾手取功名
莫遣低頭嘆衰老茲行賦歸何時來元方遲爾黃金臺
勿隨斥鷃藩籬下枉却驂騑泛駕材

送陶給事陞閩憲僉事

江上草新綠都城春雪晴玉缸攜酒共君飲紅亭醉醒
空離情問君此行何慷慨攬轡超超渡閩海青瑣多年

舊有聲赤心一片終難改玉節觀風八郡傾人人同仰
范滂名陶潛解印身雖逸桓典乘驄衆所榮判袂相望
不知久渺渺青山重回首別後含情空憶君謾對蕭條
白門柳

賦得海門潮信送黎春之還鄉

海門蕩濤深千丈潮去潮來如有期夕陽欲沒退偏早
晚月乍升生太遲退早生遲自無爽行人到處占消長
終年空打崩浪磯半夜遙通女兒港清淮不泛鴟革魂

潛來默去朝復昏汀洲但見沙禽跡島嶼惟餘石蘚痕
黎君晏歲乘潮去路指海門奇絕處覽勝應知造化工
吟清信得江山助解纜開帆舉畫橈汧流激浪隨風颭
回首行人不可見往來惟見海門潮

題施生吳山圖

伯鸞自安田野性季鷹謾有尊鱸興何似施生住日邊
吳中山水壁間懸山水蒼蒼絕垢氛看圖不異在吳門
亭間一叟書長把樹杪飛流響不聞蒼苔白石菰蒲綠

溪上誰人補羅屋數拳晴雪見棲鷗十畝涼陰翳高
木我昔巢棲五老顛松風桂月伴雲泉竭來委質事明
主敢念池魚思故淵瑤枰謾想溪邊奕碧草空懷洞裏
眠緘情劃爾發長笑清宵夢繞香爐烟

題意上人卷

意公優游樂禪寂獨鶴片雲比蹤跡半世辭家念已忘
諸方乞食人皆識水月觀心無減增曾叅達磨禮盧能
手持解脫千年錫口誦楞伽萬變經風旛不動空緣業

深悟菩提賴言說慈性圓融任去留幻身聚散輕生滅
我欲歸投選佛場蒲團貝葉共禪床金螺山下尋蓮社
白鷺洲前結草堂

送張生遊金臺

幸遇太平日觀光快嬉教春衣白鳩舞煖帽青貂袍都
城列雉森崇墉榮光喜氣何葱葱風雲觀闕異人世皞
熙自與華胥同張郎英年頻此遊憑高弔古窮冥搜盧
溝曉月帶冰渡易水秋風終歲留豪來得意金不惜秦

樓楚館皆相識飛觴醉殺青蛾眉紅錦纏頭恣拋擲詞
垣鑿坡總鉅公古文奇字比揚雄填門請謁不輕予揮
灑淋漓盈卷中卷中題詠真奇絕珠貝晶瑩玉重疊夜
郎誰數李青蓮湖海詩聲久消歇南來北去屢往還半
生多在江淮間經行到處且歌笑莫教辛苦愁朱顏愁
朱顏易蕭索大夫慎勿念功名紫馬馱錢買歡樂

題三友卷

世人結友結貨利知君結友與人異半生締交只三物

對之不言心已契偃蹇虬龍當檻蟠冰魂翠袖靜相看
因悲薄俗隨冷煖聊托幽芳共歲寒願君終身勿相棄
豈必彈冠復聯袂苦口雖無藥石言同心實有金蘭義
君不見紛紛輕薄流朝作刎頸暮作仇人情真似翻覆
手三友貞姿寧易求

朱紀善夢草軒

朱從軍伍間其弟達省竟沒于彼

夢春草春草滿池塘謝子空含淚王孫幾斷腸夢春草
春草池塘滿麗日友于情悲風死生感夢草轉堪哀繁

霜一夕來凋零餘片葉憔悴只枯荻他人夢草得好句
我夢草悲紫荊樹少年夢草已傷情老來夢草骨亦驚
幾回枕上睡初覺殘夜孤鴻不忍聽

栢室

楊家住在南山側不種棠梨惟種栢棠梨開落易衰榮
栢也亭亭色鎮青屈曲靈根蟠厚地崔嵬鉅幹拂高冥
天風乍起生竽籟撼屋驚濤忽澎湃雷霆白晝走蛟鼉
雲霧中宵見光恠良材自有神明扶下視凡木皆庸奴

狄門桃李敢爭艷田氏荆花差可徒楊郎愛之如愛寶
四季俱宜夏尤好赤日行天暑不知清陰覆地涼偏早
孔明廟前根久枯御史臺中樹亦無何似君家書屋外
蕭蕭寒翠兩三株

羅郎生子歌

羅郎通家良子弟長在豪門偏意氣衣紉藕絲績縷輕
扇寫蠅頭字形細才華磊落識時宜早有芳名閭里知
不學寒酸腐儒輩肯隨浮薄市廛兒仗義疏財邁流俗

終年只把遺編讀問學淵源推豫章一脈書香要令續
昨日驚聞忽捧珠天上麒麟骨格殊美錦爛編裁襦祿
高閣窈窕掛桑弧桑弧由來表奇瑞清尊綺席犀錢會
何人還解聽啼聲先卜異時兒富貴

胡子壯遊歌

識子壯遊日才華杜樊川揚眉吐英槩遠泛江湖船江
湖少俊非凡儔青羅束帶烏貂裘揮金買笑縱歡賞等
閑到處成淹留淹留從教秋復春身輕富貴若浮雲璫

簫度曲對花聽翠被籠香和醉薰家聲意氣誰可及喧
呼劇飲爭豪逸飛觴百罰雙妖嬈豈惜纏頭錦盈匹光
陰悠悠逝水忙忽看玄鬢點吳霜嬌歌慢舞志終極長
揖相知歸故鄉歸來舊態都忘却貌得高情在林壑獨
行只挾琴書隨好境登臨有真樂風流一去散如萍天
涯無復尋芳盟鴈門學士妙文翰揮毫莫寫平生情平
生情良未足九京若更逢何戡重唱當年渭城曲

竹軒歌

挺挺餘萬竿亭亭最耐看四時不改青攢攢鳳凰翎綴
碧琅玕搖落窮冬木皆墜叢色依然獨蒼翠節上長留
六逸詩葉底猶懸七賢珮時人種花媚春暄鼓簫酣賞
集華軒高幹凌雲豈解識芳筍叶律詎曾聞憐生瀟灑
晷盈卷笑我參差種滿園莫謾學他桃與李開花着子
狄公門

寄定岩戒上人

鍾山老禪精律戒少小為僧今老大菩提非樹鏡非臺

比却盧能更超邁諸緣泯絕七情空萬念消磨一性融
澗水原同清淨想隴雲渾似去來蹤自言真能忘色相
壞帛紉衣枯竹杖飄如海鶴輕如萍遍遊五嶽稀定向
片月翛然物外懷行藏不許世人猜布金應隨長者園
持鉢或赴龍宮齋知師無求復無著眼前衲子那可學
浮生若未斷六根幻軀豈得揮五濁我時雖見宰官身
意馬心猿久已馴擬撥懶殘煨芋火蒲團分座話聲塵

鍾山樵隱歌為陳徵士致廣作

金鏞墜簾知何日化作圓峯翠堪挹就中間有束薪人
絕似飄飄晉王質行歌伐木窺雲泉遇着圍棋世外仙
倚樹傍觀未終局斧柯腰下爛多年劃然更作蘇門嘯
奇響鏗轟生衆竅恍疑霜夜泊楓橋百八鯨音震岩嶠
不識人間利與名優游勝處樂餘生烟霞放浪忘情久
笑殺驕妻會稽守

題王母圖

御風八駿歸來後世上徒傳白雲調承華秘殿九光燈

茂陵五夜清齋候紫氣紅光爛燭天青鳥先將消息傳
層霄頃刻阿環降龍顏不及蛾眉鮮初人自與時人異
長生之術非難致金盤空食五枚桃笑殺劉郎匪仙器

題董生卷

董生行年過三八早攻醫術兼筆札扁倉遺緒屢探尋
晉唐妙蹟頻摹搨鬪雞走狗非爾宜難經書法稍通知
揮毫切脈名並馳抄方學帖少暇時潛心積久鎮臨池
池波染墨玄凝脂堦前未作鐵門限園中惟種仙靈脾

近來小楷甚道媚一戈一畫不容易韻度微窺洛神蹤
規模剩得蘭亭意杏林子弟誰如汝四人請療三人愈
持箋覓劑爭造庭真行丸散欣然與巖學士劉河間各
專一技未是難董生二者寔可取字攻藥效衆推許若
教更下苦功夫便足繼韓公茂并詹孟舉

題周叅政所藏山水小景

天壤有異境描摹付良工佳山與秀水幻置軒窓中村
村陌陌皆勝處花竹園林饒雅趣過鳥疑飛却不飛行

人欲去何曾去松坡竹塢疊更重雪瀑倒瀉青芙蓉岡
巒島洞盡在眼樵牧耕釣俱可容九曲溪流漾清泚荒
渡斜陽見舟尾石上吟翁鎮日留欄前眺客經年倚我
觀風物似杭州樹木雲霞分外幽豈必西湖有奇勝展
圖高興亦悠悠

題嚴灘獨釣圖

桐江連天兮秋水長富春摩空兮烟樹蒼客星兮寒芒
漢宮兮苔荒彼爭攀龍鱗兮銘勛旂常此寧着羊裘兮

垂綸滄浪以足加腹兮忱故態之猶狂廉貪立懦兮揭
世之防雲臺釣臺兮其高頡頏二十八人兮圖像已忘
先生萬古今歸祠堂

題猗蘭圖

莽平原兮豐茸傷極目兮棘叢棘叢兮匪管則蓬彼美
君子兮玉雪其容湘之水兮幽且雄騰蛟螭兮舞虬龍
晝黯黯兮雨溟濛渺音塵兮何由通徒結鬱兮寸衷川
迢遙兮路不窮些招魂兮托予悲攬芳菲以佩服兮聊

飾夫厥躬色之泛兮光風芬之播兮谷中微佳人兮我
誰從思重華兮莫逢羌獨懷古今寄絲桐

題道士陳致靜棲霞亭

黃冠棲霞若棲木朝與霞居暮霞宿閒無几榻只依霞
千頃霞光炫人目謂霞可棲仍可飡謳吟嚙嗽霞中間
霞東煌鉉上初旭洞照肺腑如霞丹人疑爾真在霞上
爾托霞名聊自誑或疑或誑霞不知霞爾是非皆幻妄
嗟予久愛烟霞好擬衣霞綃拾瑤草還尋鍾呂躡飛霞

同飲霞漿後天老

題秋塘鵲鵲圖

秋風浙瀝秋塘淨菰米沈波荷折柄翻藻魚跳水氣腥
採菱人散歌聲定蓮莖嫋嫋綴枯房上有雍渠立晚涼
翠蓋裂殘渾改色紅衣落盡尚餘香圖中頗得周詩義
未論工拙先觀意不寫和鳴寫急難人間誰獨無兄弟
嗟我龍鍾命弗齊今年同氣委黃泥白頭徒重鵲原感
展卷他鄉忍淚題

題夏良醫復真卷

復真先生泯世緣耳聰目炯髮鬢玄熙恬淡泊得所養
元氣不耗精神全梁園曩歲始識面問荅喜聽吳音圓
醫師誰最擅高手只數夏氏尤攻專初疑傲兀態簡抗
漸久漸覺逾恭虔夸毗縱恣逐物欲妄認廣偽戕其天
黏花綴葉厭靡麗獨尚質素操益堅我慙老至百念冷
但願古道今重還澆漓盡除淳朴返巧詐悉屏輕浮悛
先生謂與已意合屢接談論陪周旋去秋邁疾勢頗怠

喘息屢續加沉繇危如泛海駕鉅浪孰能力挽風中船
先生製藥親為煮服未終劑病已蠲體胖心廣真性復
坐卧自在行輕便觀形察色奪造化宣有起死回生權
桔之則天保則壽具載文記非虛傳由茲致謹敢暫忽
夙夜兢惕如臨淵方知根本在握固解使短促翻長延
先生領首向我語復真此外無餘詮仙方奇秘諒難學
金丹辟穀皆徒然何如曠懷飲美酒麴蘖可引松椿年
曹騰一枕醉眠裏夢到太古羲農前

石泉茅屋歌為致仕趙尚書作

良嶽暮雲表夷山芳草邊
河流浩蕩向東注綠樹遠近
皆平川梁園空曠萃森爽
桑畦麥壟相接連那知城闕
別有最佳處泉甘石潤殊幽
偏是誰心賞得真趣柴門
芟舍臨漪漣其中之人情高
列仙坐對嵩岑卧聽潺湲
聲疑珮環振勢若虎兕騫荆
薪夜煮代糧糗柳甕曉汲
烹蘭荃初平徒勞牧紫烟
此地亦復如羊眠或漚或泛
長涓涓絕勝廬阜千丈懸
拾遺偏側朴陋只數椽豈似

茲室花竹妍憶從垂紳正笏位八座經濟詎敢思歸田
功成掛冠拋世緣却尋舊隱蘿自牽一泓任教春雨漲
三重未怕秋風掀已欣懇玉皇案何妨笑拍洪崖肩展
公錦囊卷寫我瑤華篇擬陪杖屨弄雲月洗耳清泠聞
舜絃

題夾竹桃花圖

修竹傲冬雪崇桃媚春陽剛柔既殊性艷冶寧聯芳畫
工未必知物理強寫清標伴妍美氣味原來自不同枝柯

詎肯輕相倚，翛然鳳尾靜。且幽下視靡，蔓皆庸流貞。姿豈
作俗花友，直節終非凡卉儔。回首韶華易枯槁，雨折風
飄委泥潦。憔悴空憐曩日榮，妖嬈寧復前時好。此君依
舊挺長竿，四季皆宜夏更寒。萬紫千紅零落盡，青青還
與報平安。

送朱逸樂還鄉

鶉啼燕乳催春色，練萼飄香不堪摘。幽岐駿馬越羅衫，
汴碭遊人故園客。君家前代多簪纓，宋元詩禮留芳馨。

約山煌煌郡倅貴架閣侃侃儒林英慶門積善天所祐
百年煒燁科名舊乘軒要路總豪雄考槃絕澗都耆壽
我朝泰運開隆平阿翁屢被賢書徵遺榮懇辭民社寄
養晦惟結鷗鷺盟承傳復得難兄弟就中逸樂尤瓌異
銅臺豈憚登眺勞梁園共詫歌詞麗蹇予垂老臨大藩
撫綏緝理稀曾閑薇花深署到者少幾回談笑生歡顏
况又相知且相契魚水親情篤高誼數載頻蒙慰藉勤
一旦寧云別離易君家奕世居烏江石潭孤塔街市長

雖無紅杏照顏色尚有青松環草堂鵬坊西行亦咫尺
竹林羣彥多能識會間倘或詢何如貧是為官好消息

題白海青圖

有鳥有鳥海東青羽儀戍削心性靈奮身晴滾半空雪
舉翮秋摩層漢星皇仁誕敷被冰壑物類隨應踰滄溟
九霄振翼逐流電千里轉瞬追奔霆飢來那暇闔林藪
宿處正欲投岩扃神恬意定色鮮潔麾之不去亦不驚
初疑稍迫必翔翥徐呼亟下尤安寧野夫耕耨豈庸此

時將奉餽親藩庭王雖甚愛弗敢蓄薦諸丹扆輸忱誠
想當胚暉潛孕秀氤氲聚川原精陰升陽降亭毒運
鉛旋汞轉英華凝山都護巢霧氣涵木恠守樹風威停
瓊丸迸裂曜然出月光灝采同晶熒銀河晃潏濯奇質
玉露厭浥溥脩翎堅剛勁爪鐵鋸利蒙茸淺毳霜輕盈
體排踈花墨痕淡目燦懸鏡金睛明皂鵬固當遜豪逸
蒼隼孰與爭憑陵恥擒狐兔獵梁苑榮廁鸞鵠朝神京
絨條繫足錦鞢臂韋籠冒首朱衣擎三司寅送擁冠蓋

百騎肅導揚旌旌嶽祇祛塵斂氛祲瀆鬼挽舫浮清泠
在途擾馴態閑暇入覲竦惕心屏營窺覘未許貴官覩
哺飼先得虞人矜至尊含笑錫盼顧詞臣獻頌歌祥禎
上稀游畋既罕用爾縱猛驚何由呈惟叨養畢微命
更辱卷軸留遺形老拳謾誇滴水鵲真骨徒詫綿州鷹
作詩紀瑞拜且祝天子萬壽王千齡

昔年謠示七郡父老

昔年我來徵需重爾有田園何暇種今年我來民差好

諸般免却無煩惱昔年逃夫今不追昔年逋租今不陪
今年頻赦昔年罪昔年流移仍撫綏白頭父老來汝告
朝廷厚恩要補報便應差徭莫欠糧休賭錢鈔勿為盜
勿為盜休賭錢男子務稼穡女子治絲綿俗皆淳美人
晏然我亦思如召伯賢

陌上桑

曛曛曉日艷陽天此時秦家蠶正眠春深桑葉嫩芊緜
羅敷採摘出城邊東條西條相糾纏滿目淑景麗且妍

繁紅芳紫萬仍千輝煌宮錦絢晴川照見羅敷貌嬋娟
鬢雲倭隴鴉色玄步搖斜插釵鳳偏素姿何曾屑丹鉛
香艷皓齒疑貝編眉橫青山黛綠填杏臉細膩霞暈鮮
項如螭螭搓玉圓額角斜貼翠花鈿寶璫耀耳瑪瑙懸
裙拖秋水籠步蓮月鈎窄小進難前盤囊錦帶綴珠璇
同心綰結一雙聯暖風披拂飄蘭茝從傍過者驚復憐
畫道羅敷是神仙使君駿馬來翩翩下馬揖贈黃金錢
欲同攜手共周旋羅敷低頭久默然逡巡微聽細聲傳

自陳未筭窺簡篇頗知禮訓守貞堅閨房節操雪霜蠲
瑩比明蟾照清淵夫君豪俠稱英賢才兼文武寔兩全
驂騑絲轡象牙鞭麒麟鎖甲劍龍泉揚麾分符領兵權
雕戈畫戟擁旌旃流蘇複帳駝絨羶博山亂噴沈水烟
侍兒濃粧森後先霞綃長裾舞徧禋左迴右轉何輕便
舞罷巧按鷓鴣絃烹羔刺豹開瓊筵蒲萄名酒滿觥船
犀筋不下飫腥羶夫君歡娛無與肩羅敷嘉言皆陳宣
陳竟斂衽攜筐還人生妃匹本定緣使君有妻諒盛年

丁寧疾驅歸去過結髮義重勿棄捐

題西湖景畫

平生夢寐想西湖老大纔能閱畫圖
繞村幽徑不堪步橫渡扁舟若可呼
天竺鐘聲出雲裏雷峰塔影沉波底
花間綠綺蒼童抱柳下朱闌翠鬟倚
汀鷺聯拳雪羽毛淵魚撥刺金鱗尾
遊人競泛總宜船三三兩兩六橋邊
細文輕絹新裁扇淺色香羅初換綿
迴橈別自尋佳處直向菱荷盡頭去
風蒲烟葦接連洲露葉晴梢高下樹

曾聞此地最繁華試訪錢家與宋家故趾春深走麋鹿
古城秋暝啼鴟鴞事殊時改空陳跡射潮有箭留砂磧
墜井銀鈺許世傳渡江泥馬知誰識葛嶺妖桃照眼紅
蘇堤芳草傷心碧華堂永日玩丹青逍遙絕似武林行
憑君莫說杭州景惹起登臨無限情

薛將軍具慶歌

薛將軍驍且雄鼻端出火耳生風身名挺特萬衆中守
邊從征西復東搴旗斬級頻立功曾掃勍敵平諸戎傾

心盡誠事太宗振威揚武比虎熊腰懸秋水雙芙蓉勇
字題盛明月弓擣虛敵堅當前鋒勲高報厚爵秩崇光
華富貴夫婦同十子英俊氣吐虹定省早暮齊婉容綵
衣新染鮮且濃膝傍笑嬉色和雍焚香酌酒拜上穹願
祝庭闈壽如嵩福祥競集二親躬共享祿養樂無窮蟠
桃結實屢春冬燦若暘谷曉日紅帝令我在王母宮世
得食者升太空瀛洲羽客號赤松應能憫念將軍忠玉
手自摘丹霞封兩枚下賜媪與翁我聞此果不易逢味

纔入口顏還童具慶天長共始終

騶虞歌命補作

鈞州有獸馴且仁身如白虎性如麟雪月英華為骨格
陰陽秀淑作精神雙瞳每訝常懸鏡四足何曾暫躡塵
墨縷紫膚濃染黛霜茸剪毳巧絲銀絲銀鏤壁相鮮麗
稟性慈良不搏噬盼顧生草忍踐傷逢着生蟲恒引避
熊羆屏息既欽服獬豸聞風慚猛厲山融川結自應殊
鬼護靈呵疇敢易衛士窺覘敬啟王王言此物異尋常

命披爾雅深論討使閱周詩細考詳爾雅周詩同一義
名曰騶虞端的是皇家恩澤久涵濡海寓休禎聿來至
來至爰從汴水隅清齋晨迓即郊墟藹藹芳花映水質
瀼瀼繁露濕文軀文軀寔匪蒐田得純忠純孝能敦格
雖云地產壯親藩忱乃天教彰聖德隊仗戒嚴軒檻盛
軍校舁隨帳幕行窈窕腰間披繡帔玲瓏領下繫珠纓
萬斛樓船連夜發千聲笳鼓一時鳴遙辭艮嶽梁園境
速貢蓬萊建鄴城蓬萊咫尺五雲間王躬進獻悅龍顏

側身拜舞趨蹌巧垂首盤旋氣象閒垂首側身仍側耳
妥尾徐前復徐止夕卧香茵禁苑中朝濯甘泉御河裏
得侍金堦燕玉墀屢啖黃流并紫芝廷臣稽顙盡稱慶
儒官伏闕競陳詩賜出京城民快覩老壯奔馳日旁午
擁道爭看雜女男填街隊仗喧簫鼓填街擁道共嗟稱
穹祇薦此瑞朝廷底須想象空摹影幸遇昇平真見形
共詫奇祥冠今昔誰知宵旰存謙抑所重年豐所寶賢
洛龜宛馬誠何益蕩蕩巍巍昌運開熙熙皞皞似春臺

永沐周南召南化為歌為頌愧非才

賞牡丹聽琵琶歌

檀圓頂細中空洞翠索金環妥肩重泛商流徵斷仍連
愁怨歡娛雜悲痛彈來彈去音和平滿座回顏帶笑聽
轉到天香牡丹品玉笙寶瑟一時停小鶯學語泉出竇
湖面跳珠飛雨驟兩絃剛勁兩絃柔促急舒徐自先後
謾說開元賀老名梁園別有擅場聲花前衆樂纔收響
一匹纏頭錦先賞

梅隱歌為蕭醫士作

曾隨羅浮仙夜訪蕭史臺臺前幾株樹粲若瓊瑤開粉
面娉婷淡梳洗娟娟綠萼嬌相倚龍宮舞女白霓裳解
珮招邀明月裏須臾晴雪灑石闌長風不惜輕吹殘寒
芳忽遇蕭史裔幽情雅致真難攀筍皮裁冠紙裁帳惟
耽嘉遯無官况飲冰寄傲寒香中憂患何緣到心上巡
簷行歌貪看花尋常每至參橫斜軒裳夢斷任身懶山
水情多從鬢華縱令對酒吟東閣爭似扶筇探西郭第

能曾並濟川舟效用終慚活人藥活人應多功已深年
年着子滿高林陽回一氣得春信生生孰識堪興心調
羹事非成契濶回思故園渺天末獨餘酸味今尚存謾
道能除世間渴

題祖來上人羅漢圖

佛法無外無中邊無起無滅無斜偏閻浮衆生泡影然
聚散倏忽非牢堅業風播蕩苦海掀流轉沉溺疇能援
大雄世尊興憫憐慈悲為棹波心船拯拔羣類出蓋纏

伊誰奉命司化權三六開士相蟬聯涅槃不住大千
人人變幻神通全導迷誘昧息妄緣白雲枯木空岩前
蒲團宴坐禪宗禪金環杖錫樹杪懸有時羅齋入九淵
珠宮貝闕長周旋摩竭迎送惟擎拳有時松下談真詮
猿聽虎侍紛後先袈裟半着袒右肩有時赤腳臨奔川
所乘之筏汀蘆編萬頃徑度輕翩翩我曾夢訪石橋仙
賓頭盧與論三玄若飡沆瀣飲醴泉百花茶香親手煎
鉢盂水滿騰蜿蜒覺來一室空雲烟只今回首知幾年

虛名羈絆世事牽也知維摩疾未痊螺山上人絕葷羶
持畫請施羅漢篇展圖諦視峯巒巔十八尊內見兩賢
雙瞳深碧綠髮鬢項光閃爍頂相圓細民舉首仰視天
再拜求救甦顛連上人戒律確且蠲根塵識想俱泯捐
早成正覺坐青蓮梵釋圍繞龍象筵應真此時恭執鞭
我言豈異佛口宣亘億萬劫長流傳

禱雨中嶽有應賦此以答神貺

剖開洪蒙奠清濁匯為湖江峙為嶽四方環列獨崧尊

氣壓中州勢磅礴衆峯摩雲排玉筍曉翠夕霏紛錯落
儲祥蘊秀產英賢捍患禦灾司善惡累朝褒崇載祀典
寶播天香照林壑重門秘殿儼深邃孔蓋長旂下寥廓
憐斯縣小壤田瘠加以旱乾溝澮涸我齋致禱竭寸忱
詎意昭孚類期約飛廉霹靂咸聽命甘澍既傾炎暑卻
頓令凶荒轉豐稔復使愁憂成笑樂微衷曷以答神貺
跼薦溪泉羞杜若宇宙昇平廟貌新萬古千秋鎮伊洛

耕讀軒

男兒志氣固巨量恥學術藝羞為商屈指只今踰二十
廣額秀眉瞳子光生來本是愛閑者乍可騎牛懶騎馬
數畝腴田手自鋤幾聯佳句人爭寫庸流豈能知丈夫
笑爾把耒仍讀書古之豪傑寧苟出富貴縱得徒區區
且適林泉隱居樂漢史何勞將掛角遠壟秋風稻穗齊
短檠夜雨燈花落不見南陽諸葛公油然高卧草廬中
殷勤不有三番顧磊落應無千載功

漢武帝將軍栢歌

茂陵求仙期得仙思驂玄龍飛上天密函祕檢事封禪
宛馬馳來崧嶽前崧前獨愛三樹栢錫以官名表殊特
至今猶說是將軍香葉屯雲凝翠色當時立心隘八埏
一舉欲息崑崙顛窮兵瀆武事遠畧此豈解有冲昇緣
秋風辭哀萌晦早王母桃花幾回老金莖瑞露成清淚
珠襦玉匣埋荒草羨渠老壽在名山駐齡弗藉文成丹
詎諧獲聽方朔論侍從曾識枚臬顏禿枝銳幹如銅鐵
傲雨凌霜古皮裂地籟朝驚萬壑風精靈夜泣三更月

武皇不歸時代遷遺爾臃腫烟霞邊固疑孔檜頗相妬
且喜社櫟能忘年武侯廟廢摧千丈新甫之材聞斲喪
若論秦皇避雨松雨松亦是平交行

題並頭牡丹圖

誠齋天潢尊游藝妙通玄名花擅國色盡向毫端傳瑩
其冰玉潔粲若雲錦鮮朶重榦不弱蒂比葩相聯紅嫣
白嫩孰可擬二喬初嫁爭芳妍娉婷窈窕俱有傾世貌
淺顰輕笑並立偎香肩含情含嬌深自憐絳杏緋桃總

麤俗掩面却走羞嬋娟始信摹寫精筆底造化全能令
欲拆未拆豔頃刻爛熳軒窓前抽萌固弗藉雨露賦質
政爾煩丹鉛狂蜂窺圖屢往返痴蝶側目頻留連從爾
四序更迭開依然寫成便帶長生緣榮悴不許覆載專
伊誰承恩得之戚畹錢焚香正冠再拜展向素壁懸方
知運思巧直奪真宰權永為寶玩垂千年

題蘭蕙同芳圖

少年遨嬉楚山麓蘭蕙苗深密如簇推蓬政愛江雨晴

沙背崖根相映綠芒鞋
苧服偶徐步隨處蹇芳清興足
叢叢葉似剪春羅箇箇花疑刻寒玉
新莖窈窕凝嫩紫疎莖參差飄遠馥
燕姑曾徵夢裏祥宣尼屢操琴中曲
于今老作汴梁客採掇無由到空谷
生綃忽覩精妙畫况有珠璣動盈幅
吳興王孫差可擬茂苑禪僧難並躅
狂塵曠野蕭艾繁驚見聯芳開病目
蘚沿恠石傍荆棘柴茨湘筠伴幽獨
寶之不啻徑尺璧藏以繇函惟恐瀆
龍眠底用寫九歌掩卻離騷觀此軸

送嚴良醫回嘉興迎母

先生意氣凌青蒼兩臉渥潤雙瞳光無心求伏思邈虎
有術解叱初平羊門前種橘懶種杏橘葉墜井泉浮香
春餘著花雪羞白霜後結實金爭黃嘉禾世業數誰最
公論共說先生良針茅屢試療鬼訣續柳每驗回骸方
經窺素難法岐扁科究內外兼劉張徵書一日賁林數
布衣萬里覲帝鄉庸醫歎羨國醫駭妙奪造化通陰陽
仰瞻驟近日月表陟降不離參苓傍親藩授職喜閑逸

况乃仁厚逢賢王憐渠契濶曠定省代爾懇惻陳封章
宮臣走馬捧勅至特許謁告榮非常時當六月政三伏
敢憚觸熱川途長到家拜慶上塚畢魚軒亟奉登舟航
江湖濶深富蝦蟇嫩菱鮮藕俱堪嘗船寬物賤固可樂
縱遇好境休徜徉嗟予目昏牙齒豁富貴念冷功名忘
但存詩魔與傳癖惟此二豎留膏肓願言就君乞砭治
無使久別勞中腸汀洲鴈下寒水落埭除菊綻秋風涼
河渚竚候木蘭棹壚頭爛醉茱萸觴

續海棠吟奉教作

覃懷之山內谿衍小徑逗入如縈蛇其間海棠迨千樹
屈曲枝榦相交加清明節近葢將放澗壑照耀皆丹霞
曉風夜雨恣吹灑默無語言尤可嘉從春復秋迭秀悴
幾度空谷悲年華恣態娉婷孰憐惜詎解知爾為名花
白頭樵夫束成擔赤脚餉婦簪盈髻憑誰報與好事者
凌犯危險來幽遐竹籃帶土兩肩荷數里方上移春車
剔除莓苔細剪拂置彼樂善東平家地漿滋培養根本

轆轤灌溉樊籬遮逡巡青回舊著葉次第綠茁新生芽
綺窓朝玩霧露濕絳燭夜照星河斜脂濃染未盡吐
撩亂萬點紅繁影天孫織就機上錦仙人鍊出壚中砂
玳筵逐朝遞歡賞富貴素位非豪奢汝今邂逅得奇遇
名園列植蒙矜誇西川還有奇絕品無由自達淪泥沙
我因稽首問造化如何予奪令偏差蒼穹高遠莫予答
撫圖痛悼長咨嗟

續冬青行

冬青枝憶昔南渡昇平時瑤堦左右兩行植信是閨苑
仙宮移亭亭碧玉作柯榦雨霧風晴總宜玩朝退旌旗
拂葉低細藥輕飄雪零亂豈知事變大可哀湖山歌舞
盡荒苔王氣冰銷兵氣盛玄扃不固六陵開六陵隧中
龍鳳駱義士夜深偷拾得親製衾裯裏碎瓊恭題謚號
揮濃墨捧向幽閑僻靜岡愁雲慘淡月微茫神靈翕歛
潛呵護竈穴深沉謹瘞藏復恐後人迷此處識以常朝
殿前樹翠蓋陰籠土一抔萬年枝在人亡遽屈指于今

二百秋盛衰暗逐水東流皇朝既監元朝失青史曾如
野史收空餘孤塔錢塘滸白髮遺民忍瞻覩天上威神
固儼然人間俯仰徒淒楚弗獨歎歎宋亡滄桑遞閱
俱堪傷阿瞞奸計為疑塚身死還將智力防浮世寧云
蓋棺定十二重瞳猶未瞑大招酹酒續悲歌唐公灑淚
應來聽

汴城閱武歌

南薰門外春光老絮雪晴飄教場草三衛精兵點得齊

練習今朝比常早長竿鉅旗懸將臺四面辟易行人開
前驅虎旅駿奔走太監乘馬當街來逡巡過去纔都督
侍郎叅行轡聯屬繡衣御史并三司冠蓋低昂密相簇
繩床列坐閱武亭城外擊鼓城中聽周遭柳圍地寬廣
陣勢任擺方圓形內分橫直開長道火炮冲天隊初到
殲盡雕弓冰作弦通題勇字金塗帽急鼓爭喧騎士馳
驍捷不數幽并兒掄鎗奪稍左右射互騁才藝誇神奇
一聲遙聽敲鈺響輸者鞭笞贏者賞荷戈束甲捲旌旃

沿路飛塵撲歸鞅風傳簞策遠近鳴紛紜部伍各返營
太平方信從軍樂惟請衣糧不出征

江湖清遊歌

何郎落魄非頑癡氣豪志雄才不羈一從束髮厭雌伏
齷齪羞效東家兒躬耕把鋤既云苦閉門佔畢亦奚補
浩蕩大鵬希有心四方上下如鄉土長揖里閭親笑別
閨中人擬船待明發呼酒醺江神雙櫓齊鳴片帆掛脫
中高眠窮蓬下但聞佳境即停橈客裏尋常過冬夏屢

攜姑蘇娃數試宜興茶瓊花已枯槁玉樹空繁華鳳臺
鐵塔頻登眺只將樂事酬年少青山曾訪謝公墩綵筆
留題蔣侯廟懶向秦淮終歲留逡巡遙泛武昌舟寒波
赤壁三更月斜日黃岡萬頃秋鶴樓鸚鵡冥搜倦跨馬
著鞭仍適汴河嶽風雲豁壯懷宋金舊跡觀皆遍孔方
通靈衆所趨那知阿堵能亡軀爾雖好遊非利驅頗出
俗流情獨殊都拋蠅頭棄蝸角遊固可嘉居亦樂長歌
痛飲醉復醒慎勿閑分清與濁我今老矣雪鬢垂毵毵

奇勝負却窮幽探無緣行覽惟坐談吟成揮毫題水衙
願子細讀精研覃

題竹為精微陳徵士作

郭侯寫竹真有名平生少寫風烟晴興來只愛春雨態
毫端幻出如生成一竿亭亭儼中立兩竿垂垂梢葉濕
月暗蒼梧鬼魅愁波驚渤澥蛟龍泣精微齋裏客來稀
坐對新圖靜掩扉丁寧莫向青雲掛只恐隨梭破壁飛
送葛維彰人材還鄉兼寄聲精微陳徵士

銅龍水乾漏聲小魚鑰金寒霜月曉警蹕初鳴雉扇開
紅雲半露天人表布衣小臣衰朽餘來朝乞得垂老軀
龍鍾何以展報效但願擊壤歌康衢秦淮北風疾於箭
扁舟到早如乘傳天上人歸鵲預知甕頭酒熟孫能勸
忘機笑傲林泉間高情長與雲同閒時人莫訝鬢成雪
承恩兩度瞻龍顏蹇予久作詞垣客謾寫新題壯行色
同是青原白鷺人我獨胡為歸未得送君不盡思君情
臨分忍聽驪駒聲憑將千里故人意寄謝精微賢弟兄

題趙敬重遊錢塘卷

詔南有客三十強壯心銳欲窮遠方轡按追風俊叱撥
舟乘破浪輕舳艫絕倫帽頂猫睛嵌異樣條環瑪瑙裝
資生有利隨時逐遇景無妨判醉償充盈貨貝傾同侶
磊落情懷超衆商半生浙水久留戀覽勝探奇渾未倦
楮塘芝塢幽尋數篁嶺蘇堤冶遊遍煮茶頻汲白公泉
沉沙屢訪錢王箭香羅細葛良工裁嫩藕鮮菱老翁獻
恨無磨勒盜紅綃喜有芳華侍紈扇段橋西畔總宜船

萬頃湖波綠浸天兩岸高峯擁禪刹四時妙樂沸歌絃
保叔塔存僧已去秦皇纜朽石猶傳且向人間作財主
豈須世外為神仙莫辜汗漫江湖好千金買笑度流年

蟠桃歌壽辛太安人八十

吾聞蓬萊山其上玉為宮蟠桃九千丈特種瑤池東萬
年柯長翠累襖花始紅夜守命列缺晝衛驅豐隆仍經
厯劫實乃熟爛然膚色丹珠紅龜臺阿母持啖漢武帝
此後曠世想像何曾逢辛侯前身疑赤松清宵神遊謁

真境拜乞擬駐慈親容不學方朔偷誠懇亦見從果蒙
仙賜遽驚悟起視已在高堂中鮮凝霞漿湛曉露新絢
雲彩輝晴虹焚香跪擎奉母食食之靈液流心胸形質
肉骨都換精華融髮如黑漆顏如童雙目炯兩耳聰徒
誇延齡九還七返功纔登八旬直至百歲壽未窮榮膺
恩命更進夫人封後天而老乘飛龍

壽朱君立則夫婦初度

蟠桃樹在瑤池東樹上之實丹砂濃雷霆守衛雲霧封

有得食者升太空朱家令子學泮宮祝親壽考感上穹
帝勅金母並木公兩枚下賜嘉孝恭清宵墜向高堂中
明晨捧獻媪與翁味纔入口腸已充白髮返黑增顏紅
耳聰目明肌肉豐循環花甲無終窮萬八千歲方孩童

題張憲副山水

何郎畫法咸稱工層巒複嶂生筆峰晝陰作寒雲霧密
樹色凝黛嵐烟濃千崖萬壑驟雨歇洗出重疊金芙蓉
超騰猶奔馬奮迅若蟄龍忽偃遽竦森從龍瑤簪瓊筍

杳靄磨高穹淋漓墨瀋奪天巧能令造化無全功恍驚
攝提初宇宙開洪濛結就仙岩之峻琵琶之雄玉氣夜
白丹光紅參苓朮飄香風留侯奕葉遠孫子卜築講
學棲其中每將林泉芳潤嚙嗽怡心胸辭家入仕三十
載舊隱蘿逕屐跡莓苔封地寬壤沃景寥閭絕勝海上
人罕得到蓬萊宮虛亭臨泓細路遶小橋橫岸新流通
鐸冠苧服物外更尋幽覽勝棹輕舫兩眼飽看船頭峯
蒼山鬼谷貴溪水秀淑代有賢才鍾嗟予本是釣耕者

宦途浪寄浮萍蹤老至百念都成空
惟有傳癖兼詩窮
可憐觸處隨病翁寧思棗如瓜弗羨印似斗但願引退
休微躬廟堂長揖別卿相矐畦徐步偕樵農體倦蔭雙
松神閒撫孤桐窓間故笈父書在掩闕坐讀歌時雍身
雖未行夢先往浩然興落盤洲東還君此軸匣琴劍懸
車不待今年冬

題嚴良醫山水小景

鰲簪聳滄海芙蓉飄紫烟畫工運思極精妙毫端巧奪

造化權連峯特巘各殊態一一幻出皆天然恍疑嶙峋
絕頂最高處參朮錯落根如拳氣凡肉重莫能即何由
飛步凌其巔山中之人紉蘭佩荃濯足澗底振衣風前
晨興霞療饑宵寢雲伴眠遨遊不入五侯宅偃蹇只聽
雙崖泉清流曲折相洄沿種得杏成花滿川亂紅繽紛
墜漪漣鳥啼魚躍春景妍是誰閑泛溪上船盡日獨玩
芳樹邊豈若茅亭老叟抱膝坐語笑簡默精神全小溪
捧杖心靜專新梳綠髮雙髻聯林收霧靄寺突兀橋橫

木石湍潺湲異哉世上有此境便思問舍仍求田酌君
橘葉井洗我腸胃羶聊依松栢歲寒社庶引桑榆衰暮
年

題山水

壯年飄飄意氣豪羞隨斤鷄飛蓬蒿蒼梧之山洞庭水
常覓勝處閑遊遨招邀知己二三友談笑每日乘輕艘
汀蘅渚杜俱逸興濃蘭沅芷皆離騷並櫂船頭恣吟眺
底用傲兀披宮袍鷗邊鶩畔往仍返下上湍瀨不憚勞

蓮房旋摘魚旋膾滿吸鉅竿持霜螯酒酣移船林外泊
脫葉亂墜驚猿孫細風吹樹響颯颯迸水觸石聲嘈嘈
狂歌縱飲儘放浪清醒却少多醅酌于今垂老尚遠宦
白首黽勉追英髦客窓因見畫中景恍若重泛湘江濤

贈宮監

王門內臣白且皙三十年齡承奉職緋袍胸背粲鸚桃
小帶圍腰瑪瑙赤性資敏慧才俊良眉宇秀整言安詳
爰從散地初陞秩旋蒙委任嘉忠實應接區分諸務繁

四序何曾有閒日遭逢端的是前緣富貴榮華豈偶然
受用人間好快活服事世上真神仙仙境傳聞孰能至
蓬萊祖洲此間是底須雙翼恣飛翔且竭寸心謹隨侍
勤勞暮暮復朝朝靴帽衣衫頒賞饒豪鷹雄健常令臂
生馬驍騰仍命調一般官官百十輩惟爾衆中受知最
案邊不敢離須臾黃昏月上猶未退金龍蠟箋新墨光
冰紈象管描春芳畫既精奇詩麗美叩頭拜賜偏懽喜
巧匠裝潢錦與綾一時恭玩一回驚洛川花卉相爭媚

不信丹青筆寫成筆寫成疑可摘妙奪造化渾莫測絳
羅重重包繡囊清夜丁寧要慎防神物由來鬼神惜只
愁取去洞天藏

題一榦三萼芍藥畫

茵茵秀夏暑芙蓉傲秋霜炎涼各異趣習見皆尋常東
風別有花富貴孤榦高擎三萼綴窈窕含嬌却是嬌依
稀似醉元非醉嫣然開向繡閣前中純雅淡傍清妍陰
晴月露總足愛敬側偏正皆足憐鵲巢小星本誠敬天

遣靈苗示嘉應豈特祥鍾草木蕃行看慶衍螽斯盛妙
哉妙筆妙通神貌出芳容巧奪真顏色長鮮態長好珍
圖寶筭共千春

松菊堂為祝叅議作

鉛山山間紫溪邊違松別菊幾十年只今解組賦歸去
載尋二物同周旋從教蘚蔓荒三徑喬木芳苗尚繁盛
盤桓樹底仰高標傲晚軒中諧逸興平生於爾頗有情
寓目便覺襟懷清根跑茯苓斲雪塊藥茁倍蕾攢金英

俗塵到少柴門閉密葉屯雲花繞砌翠聳端宜太白巢
黃舒最適淵明意非徒撫玩憂暫忘更憐也解凌冰霜
夢回半夜生秋籟節過重陽餘晚香朝觀夕對當窓牖
心交弗渝還耐久懶伴孤山處士梅惟依彭澤先生柳
鉅幹低藂總足怡時飄蒼雪隊東籬掄材不願為梁棟
介壽何妨泛酒卮

著存堂歌效樂天體

馮公子身是儀賓福如此福如此厚人罕儔只歎二親

成土丘成土丘頻聞風木徒淒惻重茵列鼎真謾榮調
膳稱觴難再得憶昔金閨中雀屏高堂具慶喜康寧侍
宴長思績懷橘朝回猶學鯉趨庭立宮一閱經年歲想
像痛心幾揮淚升堂儼似覲形容入門宛訝瞻冠帔升
堂入門皆見之渾疑身在膝邊時白頭尚展遺編授素
手仍將慈線持授書持線如當日諦觀依舊惟空室入
夢精神或可期終天戀慕何由畢愁聽夜啼返哺烏雌
雄不逮竟先殂念爾微禽有至性嗟哉感此涕盈裾感

此奚須徒自苦但應蠲潔奉蒸嘗一祭一回真若覩

傳奇美人才貌歌

俊儀美女名靈芝綠雲為髻冰為肌心聰手巧性溫婉
喜嗔語默皆相宜芙蓉娉婷海棠豔百媚千嬌一身占
非但天生絕世姿填詞和曲尤華瞻或吹或拍或彈絃
般般自小都學全臂繫紅綃入彤邸應知命合夙因緣
牡丹作花三月半日日教來花側畔金縷悠揚斂笑謳
霓裳轉折低鬟按侍奉追陪不暫離逡巡又及暮秋時

安排鬧熱濃粧扮演習新鮮妙傳奇府裏偏矜重九節
賞菊芳筵早鋪設淡掃蛾眉捧玉觴一時粉黛空羅列
二八年齡歡樂多好風好景酒消磨中和亭上清平調
會要菴前宛轉歌通音曉律諳文墨納令聯麻俱解得
珍翰過蒙賜詠篇香紉更荷圖顏色蓮步輕移拜案傍
氣飄蘭麝啟鶯吭寵恩隆厚何由報惟祝綿延寶筭長
崔徽徒聞擅才藝枉寫形容緘恨寄光榮詎敢比靈芝
佳章佳畫褒佳麗

題雪梅倚竹圖

旬宣曾過羅浮洞萬里藪深駐吟鞚馮夷剪水為飛霧
脩篁葉冷擎偏重撒鹽飄絮紛輕盈六出五出俱鮮明
空中樹上兩爭白月下風前都賽清乾坤一色纖塵絕
雪喜遇花花喜雪險徑雖平少客行繁枝縱好無人折
冰姿綽約真自憐高情只倚蒼筤邊先開後落得春早
易積難晞因地偏憶從移節臨他壤良夜幾回勞夢想
世間奇絕在遐陬廣平去後知誰賞老眼觀圖重歎嗟

舊遊迢遞隔天涯
瓊葩綠萼應如昨
惟笑衰翁雙鬢華
題東坡遊赤壁圖

東坡先生人中龍
才高屢被羣小攻
遭讒近謫齊安東
漁樵混跡忘顯融
豈以得喪留心胸
弔古惟訪前代蹤
兩遊赤壁當秋冬
扁舟泛泛波溶溶
東山月出來清風
舉酒屬客談從容
緬懷公瑾真英雄
破敵於此成奇功
老瞞膽落摧兵鋒
烟塵漲天烈火紅
樓櫓灰滅須臾中
故壘回首生蒿蓬
運去物改世不同
沉沙遺戟埋榛藂

臨流但見雙崖穹崖根下俯馮夷宮滔滔江漢仍朝宗
孫曹意氣寧重逢千年往事付畫工興亡割據俱已空
惟有兩賦傳無窮

題鸛鴻圖為陳則裕賦

綠筠低映桃花紅金沙灘暖波溶溶一雙鸛鴻好毛羽
相依相顧雌隨雄却憐鸚鵡與鸛鵒鎖閉樊籠傷局促
飲啄雖云豢養豐何如自在林間宿褫褫錦翼文采新
照影且在清溪濱丁寧莫去春江上江上鴛鴦妬殺人

題梅圖

補之華光本同調王冕專門獨臻妙當時叔雅亦知名
環奇總讓吳興趙吳興兄弟宋王孫玉雪為骨冰為魂
只將翰墨自遊戲持纁請者空紛紜此圖先辨是誰畫
不寫霜晨寫寒夜片月疑明又未明殘英欲謝何曾謝
仙郎風度真獨雄乾坤氣象蟠心胸花開不用雪中探
坐對瓊姿幽興濃

蔡軒

春光闌珊羣卉空別有佳植開庭中堪憐朶朶知向日
晨瞻夕仰隨西東從根著葉庇炎景逐節茁茁承薰風
芑迎朝旭蓋欹側萼媚夕照盃玲瓏大哉化工運亭毒
胚腴秀淑歸芳藂名雖不離庶草類性却解與純臣同
種之固已寓微意人心亦似傾陽恭非徒玩物實自勵
親當致孝君當忠一身兩盡家國事且復托此明深衷
為詢世上簪紱者若箇看花無愧容

題張僉憲琦公餘行樂卷

河東壤土鄰河南太行峻拔仍尖巉雄藩富盛說全晉
放勛萬古遺風覃棗榆連林晚卧犢桑柘繞屋春供蠶

素敦勤儉戒奢靡

闕

鄒與郊苗薈美稗禾覆隴

塾列衿佩書盈函乾坤秀淑罕鍾物產士磊落皆奇男
張侯挺生古并郡蚤擅才學青於藍曩為御史跨驄馬
名山到處曾遊探晴雲出岫不作雨濕翠飄空都是嵐
前年秩滿拜特命持憲江右祛貪婪田間鰥寡失愁嘆
廬左桀黠增憂慚發奸擿伏振綱紀明比較月澄寒潭

公餘問俗閑出郭屏退軒蓋穿松楠攜琴奚奴俊堪愛
髻綰兩髻餘髮毵豺狼望見驚破膽遯跡遠去藏深岩
喧啁鼓笛野翁社雜亂語話村農談民情習俗總詢遍
老鶴昂首迎歸驂栢庭稚子候門久喜笑競走牽衣衫
吾知侯心自有樂惟許點也真非凡咄哉畫手豈解此
我亦愧吐辭喃喃

聽鶴軒

皋禽清唳清無比不入尋常俗流耳虛窓夜讀浮丘經

展卷乍聞必為喜一聲兩聲落層霄石頭迸裂空山椒
三聲四聲風滿林邃岩幽壑留遺音夢醒松巢忽飛起
玄袂生寒露如洗引吭再作五六聲冰拆崖崩月明裏
嫩哉雅懷逍遙兩間即物窮理遺榮尚閒所以惟愛晏然
仙驥之長鳴聆之弗厭危坐到更闌絕勝琴操寫入徽
絃彈

周孟璉六十壽詩

璉翁逍遙靜養恬長身玉立仍脩髯平生雅好在泉石

標格灑落心清廉優閒惟許一人獨榮進却讓諸郎兼
鳩形刻杖圓類鐵鶴翎製毫輕於縑世上功名久無夢
但遇佳境頻留淹追隨老鹿最馴擾見者疑是白玉蟾
風杉雪檜陰蔽日滿袖翠濕晴嵐霑笑渠營營行路子
赤脚抗走徒趨炎歲周花甲值初度畫手戲取宣毫拈
逡巡忽見壽者相驚駭賀客爭觀瞻椿齡桂萼各三百
不須更問君平占看教弱水十回淺海屋方把籌重添

題石廉使所藏墨梅

飛雪送鴈盡孤根得春先如何一圖裏見此雙清妍冰
資玉質神仙格誰運天機描貌得冉冉寒香似可聞疎
疎冷蕊疑堪摘封柯積榦凍未消五出六出皆瓊瑤傍
開正吐總絕似歷歲經時渾不凋何用巡簷索花笑橫
幅高懸恣瞻眺酷好原欣節操同深藏頗惜臨摹妙道
傍人喁困塵埃畫就終非療渴材別有真梅着佳實明
年調鼎待公來

題會元鄧宗經先生顧老莊

瀟郊晦晦皆稻田大畦小疇相接連先生豫為休退計
剩買百畝荒城邊仍將數畝構書屋扁以願老爭誇傳
罷官拂袖便居此骭體肯受虛名纏桃冠芒鞋紫竹杖
手版納却軒車懸青衿問奇定載酒白足結社非逃禪
寧甘食力事耕耨敢厭誨人拋簡編乘閑偶出值野叟
稼穡話久因忘還向晚歸家窓戶暝酒漿旋設燈初燃
片羹炊香雜薯芋絮被卧暖兼繒綿方知隨處有佳境
奚必鏡水稽山妍親朋凋零故鄉遠茲地卜築應前緣

相期與君慎終始恐是晚節稀能全叩門昏夜得富貴
吁嗟有若乞丐然但當益勵固窮志居易俟命從華顛

美人蹴圓圖

暑退涼初生秋容淨如洗娉婷事蹁跹笑出深閨裏蹁
跹風流堪適情錦瑟瑤笙教暫停逡巡袖側肩立低
昂進退都分明豈無落花泛流水亦有白打分輸贏龍
兒擺尾原曾學鳳子搖頭舊已精兩娃嬌並銀盤面傍
觀手弄鮫綃扇三娃正蹴小官場汗濕酥胸渾未倦圓

社從來非等閒作家取巧憑雙彎眼親步活轉移速解
數般般誰道難雕闌十二相繚繞日下芙蓉猶未了髮
亂青絲寶髻偏塵生羅襪金蓮小秀色誠可悅清時慎
勿辜桂枝香滿榴結子繁華況在神仙都冰紈何用空
描寫別有人間真畫圖

富溪八景

富溪八景何瓌奇王家住此知幾時自從開闢巧排列
每一出門皆見之南山雨餘翠惹舊黛髻烟鬟照人面

萬斛凝嵐結晝陰千尋懸瀑垂晴練西符聳拔如爭雄
落日倒掛金盆紅參差樹影互搖動倏忽暝色深遮籠
澄潭浸月涼波瑩恍似姮娥對粧鏡驪領珠輝似可捫
蛟機杼響疑堪聽層巔恠石屹不敬上有雲氣長相依
晨霞迎旭或為伴曉霧飄空仍共飛三峯五嶺多佳態
松顛狂飈乍澎湃旁礧氤氲毓俊才鏌鋌蕭颯生靈籟
文江暖泛綠半篙潛通墨沼添波濤游魚喜化金鱗鬣
浴鷺嫌緇雪羽毛閑居已喜專幽處况乃周遭皆雅趣

翰苑名公為著文經筵大老能留句先廬亦在折桂鄉
白頭未得還耕桑題詩謾重季鷹感鱸膾秋風歸興長

題性靈空卷

靈師妙年慧且聰秀眉紺頂冰雪容隸山滇水歷幾重
稟法京刹春又冬有大開士幻覺公出世弘振臨濟宗
千闕楚楚皆象龍鉗錘惡辣加磨礪靈也上首才調豐
孤雲野鶴少定蹤遊方翩然西復東笠裁筍皮鞋織棕
石頭路滑莓苔封三衣濕透秋露濃行住坐卧伊誰同

笑攜明月邀清風寶坊到處多留蹤尊宿乍見驚罕逢
不發言句藏機鋒驀地一喝雙耳聾恍若刮翳開昏朦
精進幢豎高崇崇聲聞頓悟性地融安穩自在超凡庸
蒲團說禪定功輸爾根器僧中雄我慚白髮成衰慵
頗似示疾維摩翁勤勤問訊勞過從無座無飯丈室空
逡巡告別還舊峯聊為說偈明深衷天涯目送南飛鴻

題山水小景

良工寫幽景運思頗不凡高崖掛懸瀑迴野生輕嵐林

昏日欲墜天暝雲初單速岸少去舫長途乏來驂摩挲
老眼著意看彷彿還似湖湘南憶曾之官屢經此孤舟
晚泊浯溪潭葉凋老樹曲偃蹇泉觸亂石森巉岩衆禽
歸飛宿且食雄鳴雌應相喃喃平沙鉅跡虎新過淺瀨
纖鱗鷗競銜荒村無人但猿鳥古嶠有樹皆楓栴空青
冥濛翳島嶼濕翠香靄沾衣衫誰藏一匣在絕壁云是
諸葛兵書函雨催風撼只如故欲墮未墮何由探山川
奇勝恠仍險况我愛玩性所耽低回但恨弗學畫辜負

佳境心徒慚每逢好事輒為說恍若親覩非虛談于今
衰老返耕釣鬚髻兩鬢霜毵毵觀圖忽起舊遊想浩然
清興莫可緘題詩卷軸坐歎息中宵夢逐滄江帆

題孟浩然踏雪尋梅圖

浩然先生生盛唐錦心秀口冰肝腸詞追風雅諧宮商
清如環珮鏘珎璜幼鄰摩詰相頡頏予美太白叅翺翔
私入禁署逢明皇誦詩却誦南山章忤意拂袖還襄陽
嬉遊只在雲水鄉閑身到處頻徜徉溪山晏歲梅吐香

跨蹇獨出尋孤芳六花亂落紛悠揚老樹翳翳虬龍驤
癡童前引凍欲僵回顧似促歸去忙鹿門尚有十里強
先生驢背寒都忘吟哦未覺天昏黃開元治世文運昌
同時諸子皆俊良惟公製作尤擅場篇篇首首興趣長
字字句句金玉相明珠白璧爭焜煌千載不朽垂休光
題貳守費翎毛圖

紫髯別駕才氣雄好詩好畫明且公何人運思寫動植
却使造化無全功琅玕欹斜竹交翠錦綺爛熳桃爭紅

聯翩羽族競來集機忘意適雌兼雄不聞清香呀啁哳
惟見細毳紛蒙茸疾歸奮翅鬪輕快閑宿斂翮俱從容
艷葩可折禽可籠韶光都在圖畫中飛鳴宿食總人力
榮悴開落非天工方知世上有好手筆端所至生春風
諦觀此景似何處高峯南北湖西東買花載酒聽啼鳥
老矣未得來相從

悅親行

楊家矍鑠雙翁媪平生快活無煩惱中男頗解盡歡娛

拜跪膝邊顏色好，開封百物價直低。
尋常剩有豚與鷄，鮮鱗嫩菜好柿栗。
販來都聚隅頭西，買歸為具羅盤飣。
藥室香凝春晝靜，滿斟政喜甕方深。
迭勸豈愁餅屢罄，況逢禾麥豐登年。
飯炊稻米衣裝綿，願老惟知足嬉笑。
安居但願忘憂煎，隨緣供養竭醫貲。
且樂清貧慎勿辭，不見巷南富豪子。
禍罪貽親異鄉死。

贈某將軍

少日隨飛龍，風雲際良會。
方今脩文治，父子功勛遂。
惟

說先君驍且雄雁翎長刀角胎弓單車直驅沙漠外片
帆徑渡滄溟東東征西討無不預肯令敵騎留遺蹤馬
鞍壓雪耀金甲羽箭流星貫敵胸小河鏖戰河流赤將
軍身命那敢惜一死博得千年名象賢有兒承父職皇
家褒忠恩禮殊貌貅坐擁專城居將門出將傳奕葉此
語由來誠匪虛重珪疊組爭照耀韜鈴更冀曾玄紹開
暇投壺復雅歌高情祭老堪同調莫匣三尺劍還磨丈
二矛將軍壯氣死不休吾知燕領當封侯他時倘建凌

烟閣畫像期公登上頭

再贈

下邳壯節伊誰如談兵早讀孫吳書夜廬母塚輒流血
曉陷敵陣隨捐軀西江都帥誇賢子為子為臣亦如此
承歡敵愾嗣前人豈直相傳襲金紫大廷寵贈祖父功
明威昭勇官資崇碑煩史筆製詞美誥錫奎章題字濃
怙恃九原嗟不作想像音容空淚落致養無由奉筍鮓
竭誠但願傾葵藿裨校同推智畧深親恩國事兩關心

吾知燕領封侯相漢代將軍重見今

題梅

吳山繞舍栽奇卉幾樹凌寒綻繁蕊同雲黯黯天茫茫
朝來素萼添粉粧繽紛六出亂飛舞似與五出爭妍芳
水邊沙際失踈影野外風前飄暗香徐君想是羅浮客
慣貌花容染花色酒酣興適弗自珍貴士幽人皆覓得
茲圖所寫尤精神正開側吐俱逼真冰肌清瘦最耐冷
玉質輕盈不受塵費侯吾知聊托意展玩追懷舊遊地

遙憶逋仙莫可招，雖逢驛使那堪寄。
眼中畫手多凡庸，八十之年老更工。
豈必西湖船裏看，閑齋坐對勝推篷。

題南溪蕭氏山水小景

西昌有士生名宗，孤高格調冰雪容。
性惟愛山復愛畫，畫裏坐對青芙蓉。
乍觀尺素香難辨，野色川氣相溟濛。
初疑為巫峽，列此十二峯。
兩餘輕黛增鮮濃，陽臺神女彷彿精靈通。
楚襄之夢恍惚當誰窮，沐猿澗鹿悄無跡。
千岩萬壑烟霏籠，又疑是匡廬五老排層穹。
乃在彭蠡之

北盆江之東涼影倒浸波溶溶飛英亂舞垂蘿風吾家
翰苑老供奉攬秀絕頂巢雲松錦袍騎鯨乘月徑返蓬
萊宮開元諸子莫追逐吐句盡如仙語真孤雄仍聞夙
昔讀書處氤氲竟日丹霞封胡君特來索我賦笑迎起
抑揩昏瞳便令掛壁着意看其間景象既弗類運思落
筆俱凡庸僧繇久逝范寬沒海岳亦往菴居空南溪別
有奇絕地春深綠與耶溪同傑構隱映蒼檜中二三好
客勞過從酒醅旋壓黃梁春幽非桃花源邃異子午谷

土美俗朴堪耕農罕曾袖刺謁時貴屢嘗含哺歌年豐
我欲攜焦桐飄然謝塵蹤汲泉採薇療飢渴淨掃白石
彈秋鴻如何病兀繫雙足謾令清興蟠心胸揮毫寫罷
付君去殷勤寄示蘭陵翁

題吳山書舍

虎林勝槩聞天下城外城中總堪畫一峯最近是吳山
傳道渠家好臺榭其間非藏玉與珠剩有萬卷牙籤儲
短檠靜夜樂諷詠小軒永日忘飢飭寸陰那肯輕拋擲

及此少年勤致力無暇豈窺董子園不貧寧鑿匡衡壁
逢疑必辦理必窮務使曲暢仍旁通知行兼該造成德
到此始克收全功古杭人物冠江浙況乃才華邁同列
五策風簷歷歷陳一枝月桂高高折守令為坊立宅邊
新題鉅扁筆如椽比隣多少連居者若箇生男似爾賢
題雪窓蘭為濟潤上人


雪窓前元住虎丘清致彷彿支遠流解將翰墨作遊戲
寫成蘭石人爭求露花風葉含生色楚畹移來屏几側

乍見頻看若可紉初開半吐疑堪摘潤師戒行如秋霜
蒲團趺坐十笏房根塵識想已云泯色香聲味都宜忘
茲圖謾爾時時對外物豈能為已累畢竟闔浮世界空
直須悟逗真三昧寒灰心地槁木形妄緣幻質難纏縈
無蘭無石亦無畫此是菩提最上乘

送劉教諭商關西考試採玉之行

往年採玉于閩東今年採玉崑山中近來苦難得白璧
荆珉燕石常相逢世無明眼非無玉水蒼玄英委空谷

何限瑰奇不見知豈獨驪珠混魚目君不見琥璜在璞
未琢磨云誰識之古卞和



運甓漫稿卷二